

## **Gui'ch yaloj ni guxhaal San Pabl loj ree bén Corinto rliladx Jesucrist**

### *Rxhiaal Pab xtiidx Dios*

<sup>1</sup> Naj Pab, Dios bacaabee naj gacan tijb xi apóstol Jesucrist. Za' Sóstenes guie con naj, bén rliladx Jesucrist.

<sup>2</sup> Caxhalan gui'ch guie par lèjt najdi bén rliladx xtiidx Dios luguiedx Corinto, lèjt guial ma nayadi delant loj Dios por Jesucrist, abi' ma bacaabee Dios lèjt gaquidi xbejnman bacaabee tèëman gra ree bén gra lad bén rliladx ree Jesucrist, bén naj Dad par dunuj ree në par laa reeman.

<sup>3</sup> Dux Dad ree Dios në Dad Jesucrist güünle' lèjt, yabe'cdxe tèë reeman luxdoodi.

### *Rudëed Pab quixtëë loj Dios*

<sup>4</sup> Gra dxejczy rudëdan quixtëë loj Dios por lèjt zi'c ma gognëman lèjt guial rliladxidi Jesucrist.

<sup>5</sup> Në guial najdi tijbzi con Jesucrist dád ma gognë Dios lèjt, baneeman lèjt quiarguejn din guinieedi chignia' tèedi xtiidxaman.

<sup>6</sup> Zian rguien guial diidxli naj ni ma biguiejndi por Cristo diizd chi guzuloj bililadxidi laaman.

<sup>7</sup> Abi' zianczy rajpidi xyudar Dios la'tgaj rbëzidi dxej ni gui't Jesucrist zatijb.

<sup>8</sup> Abi' Dios gagnë lèjt din sudxi'chidi guidiblagaa loj ni rliladxidi laaman, chitëë xhie xtolidi chu' dxej ni gui't dux Dad ree Jesucrist zatijb.

Gui'ch yaløj par ree bèn Corinto 1:9 ii Gui'ch yaløj par ree bèn Corinto 1:18

<sup>9</sup> Din Dios diidxli rüjn xtiidxaman cumplid, abi laaman naj bèn gule lëjt din gaquidi tijbzi con dux Dad ree Jesucrist.

*Ad rayalt la' lasa' ree xbejn Jesucrist*

<sup>10</sup> Compniar raliduladx ree Jesucrist, rniaaban lojdi por Jesucrist din guidxag cwedi, ad gaquidi tio'p lala', tijbzi gol gojc, tijbzi xgab gol been.

<sup>11</sup> Rnin lojdi zian compniar raliduladx ree Jesucrist, din ma gogbeen guial yu' wadijl entr lëjt, zian bagojn ree xfamil Cloé naj.

<sup>12</sup> Guial garent garen rëb ree bejn, yu' reeman rëb: “Naj naj xbejn Pab”, yu' tää reeman rëb: “Naj naj xbejn Apolos”, yu' reeman rëb: “Naj naj xbejn Bëd”, yu' tää reeman rëb: “Naj naj xbejn Cristo.”

<sup>13</sup> Per naj rni lojdi guial Cristo tijbzi najman, din ad najt güt loj crüzj por lëjt, ad gurobnijs täätididi par gaquidi da bejnan.

<sup>14</sup> Quixtää Dios chi wan ladxidi achut mazri barobnijsan, Crispozi në Gayo.

<sup>15</sup> Chitää guiëbidi guial gurobnijsidi par gaquidi da bejnan.

<sup>16</sup> Barobnijs tään xfamil Estéfanas, per ad rusaal- adxtran chu mazri barobnijsan.

<sup>17</sup> Din ad guxhaalt Cristo naj par gurobnijsan bejn ree, guxhaalaman naj par gatie'chan diidx xhienaag gap bejn perdon loj Dios. Ad cane täätan con diidx ni yadxaløj ree bejn naj luar cu'guijc reeman par xhie güjt Cristo loj crüzj.

*Xguialrniabee Dios në xquiarguejman*

<sup>18</sup> Gra ni raguie'ch ree guial por xhie güjt Cristo loj crüzj, achet lasajcan par ree bèn zë loj nejz mal. Per par dunuj ree guial ma raya'p ree perdon,

dád lasajc xguialgüjtaman din zian rayagbee ree xhienaag naj xguialrniabee Dios.

<sup>19</sup> Abi' loj xtiidx Dios rëb:

Gunijtan xquiarguejn ree bèn ni rëb guial rajc da't reeman,

abi' guscajyan xquiarguejn ree bèn ni rëb guial rignia' da't reeman.

<sup>20</sup> Yan, ¿con ree bèn rëb guial rajc da't reeman? ¿Con ree mextr rajc ley? ¿Con ree bèn rëb guial rajc da't reeman xcwent ree ni yu' loj guidxliuj? Par Dios achet lasajc xquiarguejn bénguidxliuj.

<sup>21</sup> Abi' por xquiarguejn Dios ragbeechaawaman guial ad zayünbeet bénguidxliuj laaman por xquiarguejn reeman, zeel beenman xgab yabëëman bejn loj casti por xtiidxaman ni caylüün bejn ree. Abi' ree bèn yarii loj casti guin laa reeman naj bèn rliladx laaman, majsi par ree ben ren achet lasajc ni canin por Cristo.

<sup>22</sup> Din bèn Israel ree rën reeman guguaa reeman milagr din chililadx reeman, abi' ree bèn ad najt bèn Israel rën reeman guien reeman ni mazri nawëëg din chililadx reeman.

<sup>23</sup> Per dunujn ni caylüün bejn ree naj par xhie güjt Cristo loj crüjz, abi' ree bèn Israel rdxe'ch reeman, guiáad par ree bèn ad najt bèn Israel achet sirv rüjn ni caylüün.

<sup>24</sup> Per par ree bèn ma bacaabee Dios, zi'c ree bèn Israel zi'c ree bèn ad najt bèn Israel, por Cristo rguien xguialrniabee Dios në xquiarguejnman.

<sup>25</sup> Din ni rulüü achet lasajc guial ni rüjn Dios, laan naj ni mazri lasajc loj xguialrajc bénguidxliuj. Abi' xt ni bigra xguialrniabee Dios laan naj ni mazri lasajc loj xguialrniabee bénguidxliuj.

Gui'ch yaløj par ree bèn Corinto 1:26 iv Gui'ch yaløj par ree bèn Corinto 2:1

<sup>26</sup> Gol gogbee compniar raliduladx ree Jesucrist guial ta'nzi ree bèn rliladx laaman naj bèn rignia' zi'c naladx ree bénguidxliuj, ta'nzi ree bèn rliladx laaman rajp guialrniabee loj guidxliuj guie, abi' ta'nzi ree bèn rliladx laaman naj ree bèn za loj ree famil ni naj bèn zøjbloj.

<sup>27</sup> Abi' Dios gulej ree bèn ni naladx ree bejn ad rajcza'ct din yaya'nxtu ree bèn rajc da't, gulej tēēman bèn ad ca't ree guialrniabee din yaya'nxtu ree bèn ca' guialrniabee.

<sup>28</sup> Dios gule ree bèn ni naladx ree bejn guial achet sirv laa reeman, bèn ni naladx ree bejn guial achet lasajc reeman, bèn ni achut naj loj guidxliuj guie din chiquiedaman xguialdxal ree bèn naj ree chunin loj guidxliuj guie.

<sup>29</sup> Zianan zeel achut zajc güün benro' delant loj Dios.

<sup>30</sup> Yan por Dios ma najdi tijbzi con Jesucrist, dxel por laaman rtia'di xguialrajc Dios. Abi' guial raliduladx ree Jesucrist ad zayaltri ree casti, por laaman ma naya ree, nayajc tēē ree par laaman abi' ma raya'p ree perdon loj Dios.

<sup>31</sup> Zianan din gac zi'c rēb loj xtiidx Dios lod rēb: “Bal yu' bèn rēn guilies xvalor gajc, luar güündi zian gol gules xvalor dux Dad ree Jesucrist.”

## 2

### *Xtiidx Jesucrist bèn cwa loj crüjz*

<sup>1</sup> Compniar raliduladx ree Jesucrist lējt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx nawēēg par chignia'di.

Gui'ch yaløj par ree bèn Corinto 2:2 v Gui'ch yaløj par ree bèn Corinto 2:10

<sup>2</sup> La'tgaj guzun con lëjt ad gunetan diidx ren ree lojdi, tijbzi xcwent Jesucrist bèn cwa loj crüzj.

<sup>3</sup> Abi' chi wan ladxidi zi'c tijb bèn ni ad yu't gojl, rnijczan guial rdxeban bialan lojdi.

<sup>4</sup> Nè chi gunenë'n lëjt, chi gunen xtiidx Dios lojdi, ad gunenë'tan lëjt con ree diidx ni gūnan lëjt gan por da diidxan, benan gan rliladxidi Jesucrist por xyudar xSprijt Dios në xguialrniabeeman.

<sup>5</sup> Din guiguien guial ni rliladxidi Jesucrist zëedan por xguialrniabee Dios ad por xguialrajct bénguidxliuj.

*Por xSprijt Dios nūnbee bejn laaman*

<sup>6</sup> Majsī chi ralūūn bèn ni ma rajc ree mazri xtiidx Dios, ralūūn laa reeman por guialrajc. Per ad por guialrajct ni yu' loj guidxliuj guie, lasa' guialrajc ni rajp ree bèn rniabee, guialrajc ni yu' dxej nit.

<sup>7</sup> Ralūūn laa reeman por guialrajc ni zëed por Dios, dīn yanee ree zi'c naj xixgab Dios, xgab ni goc ni naguie'ch par ree bénguidxliuj, abi' xgab guin naj guial chililadx reeman Jesucrist, diizd chi gad guidxliuj gacchaaw been Dios xgab guin dīn gag yayal ree xanyabaa.

<sup>8</sup> Laan naj tijb ni ad gogbeet ree bèn rniabee loj guidxliuj guie, dīn bal niagbee reeman dxel ad nucaat reeman dux Dad ree Jesucrist loj crüzj, bèn ca' guialrniabee.

<sup>9</sup> Per loj xtiidx Dios rëb:

Achut waguiaa, achu tëet waguiejn  
abi' ni'quid wayūjnt bénguidxliuj xgab

por ni nagu'chaaw Dios par ree bèn rën laaman.

<sup>10</sup> Per dunuj ree ma balūū Diosan duløj ree por xSprijtaman bèn naban con dunuj ree, dīn xSprijt

Dios gran ragbeeman, xt ni mazri naguie'ch ni zëed por Dios.

<sup>11</sup> Achut ragbee xhie xgab cayüjn tijb bejn. Xsprijtsaman ragbee xhie xgab cayüjnman. Zian-gajc xSprijt Dios tijbzi laaman ragbee xhienaag naj xixgab Dios.

<sup>12</sup> Abi' dunuj ree guial ma zunaal ree xnejz Dios, ad nabajnt ree con tijb sprijt ni zëed loj guidxliuj guie, ma nabajn ree con Sprijt zëed loj Dios, din por xSprijt Dios yayagbee ree gra ni ma bazaladx Dios duloj ree guial najman benza'c.

<sup>13</sup> Abi' laa reen naj ni caylüün bejn ree, per ad por dux quiarguejntan, xSprijt Dios culüü dunujn xhienaag yanen. Zian ralüün xcwent Dios bèn ma nabannë xSprijtaman.

<sup>14</sup> Per bèn ad nabannët xSprijt Dios ad rililadx-taman ni zëed ree por Dios ni rulüü xSprijt Dios dunuj ree, din par laaman najn tijb ni ad rüjnt sirv. Zeel ad zajc chignia'man xcwent Dios din con xSprijtzi Dios zajc chignia' bejn ni rën guiëban.

<sup>15</sup> Per bèn ma nabannë xSprijt Dios por Sprijt guin rignia'man ni naj xcwent Dios, abi' ni'qui tijb ree bèn ad nabannët xSprijt Dios ad rignia't chexc zeel rignia'man ni guin ree.

<sup>16</sup> Loj xtiidx Dios rëb: “¿Chu ma bignia' xixgab Dios? ¿Chu zajc gulüü Dios ni güünman?” Per dunuj ree, naj dux xgab ree zi'c xixgab Cristo.

### 3

#### *Compniar rüjn ree sirv loj Dios*

<sup>1</sup> Compniar raliduladx ree Jesucrist, chi guzun con lëjt ad gunenë'tan lëjt zi'c ree bèn ma nabannë

xSprijt Dios, gunenë'n lëjt zi'c ree bèn ad nabannët xSprijt Dios, zi'c ree bèn qui guzuløjri riladx Jesu-crist.

<sup>2</sup> Diidx ad nawëëgt ree gunenë'n lëjt zi'c rudëë bejn lejch loj tijb xindobëz guial xo gawix ni raw bengol, zian gunenë'n lëjt diidx ad nawëëgt ree. Abi' ni'qui yan ad zile't ganenë'n lëjt zi'c ree bèn ma rignia' mazri xtiidx Dios.

<sup>3</sup> Dìn sta nabandi zi'c naban gra ree bénguidxliuj. Nadëdloj lasa'di rdil tëedi, zian rguien guial sta nabandi zi'c gra ree bénguidxliuj bèn ad zinalt ree xnejz Dios.

<sup>4</sup> Dìn chi rëbidi: “Naj naj xbejn Pab”, o chi rëbidi ya: “Naj naj xbejn Apolos”, zian rguien guial sta cayüjndi zi'cgajc chutëëz bénguidxliuj.

<sup>5</sup> Per naj rni lëjt: ¿Chu naj Pab o chu naj Apolos? Gol gogbee guial nayajczan tio'p ree bèn cayüjn sirv loj Dios persi bile' bililadxidi tijb gajc dunujn cayguieen dxiin ni banee Dios dunujn.

<sup>6</sup> Yaguie'ch ree guial naj naj zi'c bèn rxübin abi' Apolos naj bèn rguil, per por Dios cayagbeedi mazri xtiidxaman zi'c rusni'saman tijb cwaan-doo.

<sup>7</sup> Abi' zi'c bèn rxübin zi'c bèn caguil mandadzi cayüjn reeman, Diosan naj bèn ni rusni's ni rxübin reeman.

<sup>8</sup> Yan ziangajc naj con Apolos tijbzi mandad cayguieenan, rayagbeen guial zunee Dios dunujn ni rayalan bal xhienaag yaguieenan mandad ni baneeman yaguieen tijb gajc dunujn.

<sup>9</sup> Zeel naj con Apolos nayajcan compniar cayguieenan xmandad Dios.

Yaguie'ch ree lëjt naj xguiniaa Dios lod

cayguieenan dxiin o lèjt naj zi'c tijb yu ni cayüjn Dios.

<sup>10</sup> Abi' naj guial catiechan xtiidxaman najn zi'c tijb albanil bèn ni rajp da't cudad din grii xchiinman zagdxe guial bacaabeeman naj gūnan xcimiant yu guin. Abi' ree bèn ni cusnuu culüü xtiidx Dios, laa reeman naj zi'c bèn cusnuu cayüjn yu guin. Per rayal gap reeman cudad xhienaag cales reeman yu guin,

<sup>11</sup> din achut zajc guchaa cimiant ni ma benan, abi' cimiant guin naj guial rliladx Jesucrist.

<sup>12</sup> Abi' ree bèn ni cayguie'ch ree naj ree bèn ni cusnuu cales yu loj cimiant ni cayguie'ch ree naj guialrliladx Jesucrist, bal cayüjn reeman laan con or o con plajt o con ree guiaj zagdxe o con yag o con biqui o con balagya'.

<sup>13</sup> Per chi guidxin dxej ni gūn Dios xguialguxtisaman, dxel guiguien xhienaag naj xchiin reeman. Din dxej guin gac zi'c chi rajc prueb xhienin loj guij din guiguien xchiin tijb gaj bejn.

<sup>14</sup> Abi' bal rüjn sirv ni beenman zi'c tijb bèn ni ruzoob tijb yu ni ad re'ct, zaca'man ni rayalaman por ni beenman.

<sup>15</sup> Per bal che'c ni beenman, sacaman zi'c tijb bèn ni re'c lidx abi' penz rliaaman loj bajl, din zajcaman perdon per gusëebaman gra.

<sup>16</sup> Zeel gol gogbee guial lèjt naj zi'c tijb xyadoo Dios guial nabandi con xSprijt Dios.

<sup>17</sup> Abi' bal chu bèn guitie'chdojn bèn rliladx ree Jesucrist, zunidloj Dios laaman guial ruse'nman xyadoo nagle'man ni canin naj lèjt guial najdi xbejnman.



18 Ad gusquiee lëjt gajc. Bal yu' tijbidi naladx guial rajc da'tidi guial loj ree bejn, zagdxeli gol been naya din gaquidi diidxli bènrajc da't.

19 Din delant loj Dios achet lasajc guialrajc bénguidxliuj, tib lajt loj xtiidxaman rëb: “Ad rudëët Dios mod grii zagdx ni naj xixgab ree bèn naladx guial dád nasin reeman par güün reeman tijb ni ad najt xnejz.”

20 Rëb tëë loj xtiidxaman: “Dios ragbeechaaw guial xixgab ree bèn rajc da't achet lasajcan.”

21 Zeel ad rayalt chu guilies xvalor gajc guial najman xbejn tijb bejn o stijb bejn. Din xieendi ma naj gra.

22 Ma nulendi dunujn, naj Pab, Apolos në Bëd. Xieendi naj guidxliuj, guialnaban, guialgüjt, ni yu', në ni qui chu'ri, xieendi naj gra.

23 Abi' lëjt ma najdi xbejn Cristo abi' Cristo naj Xi'n Dios.

## 4

### *Dxiin ni been ree bèn naj ree xi apóstoles Jesús*

1 Gol baguiaa dunujn zi'ttzi xmojs Cristo par yasiidan bejn ree xhienaag naj xixgab Dios, xgab ni naguie'ch par bejn.

2 Per lëjt ragbee guial tijb mojs naj par güünman gra ni rayal güünman din gap reeman laaman confianz.

3 Zeel ad rutan xgab bal xhienaag ruguiaadi naj o bal xhienaag ruguiaa ree guxtis naj, din ni'qui naj ad zajct ganin xhienaag najn.

4 Din majsi bal naladxan guial achet ni mal wayünan per ad por ziant ma ganin guial achet

da faltan niz loj Dios, tijbzi dux Dad ree Jesucrist ragbee xhienaag cayünan.

<sup>5</sup> Zeel ad rayalt yadxa lojdi chu cayüjn zagdxe o chu ad cayüjnt zagdxe, gol basa'n ree ni guin par dxej ni gui't Dad Jesucrist. Laaman gusguien conin naj diidxli, o bal wali ree baguieen ree xmandadaman guidib du luxdoo ree, dxej guin yayagbee ree xhie diidxza'c guiniee Dios por tijb gaj dunuj ree.

<sup>6</sup> Compniar raliduladx ree Jesucrist, gra ree ni canin lëjt wen par lëjtan. Abi' Apolos con naj nayajcan tijb ejempl par lëjt, din por dunujn gusi-ididi ad tédla j guiliesidi xvalor bejn chitéë por zian gusa'ndi trajs stijb bejn.

<sup>7</sup> Din ni'qui tijb bejn ad lasajct mazri loj stijb bejn. ¿O xhie rajpidi ni ad baneet Dios lojdi? Abi' bal por laaman rajpidi ni rajpidi, ¿chexc zeel rlies xvalorgajquidi zi'c rulüü ad por Diost rajpidi laan?

<sup>8</sup> Lëjt naladxidi achet ryaadxidi, guial ma bayaaløj rignia'di abi' ad ryaadxtridi dunujn. Abi' naladxidi najdi zi'c ree rey. ¡Per xinix niajquidi rey din nanabeen con lëjt!

<sup>9</sup> Yu' dxej naladxan guial dunujn nayajcan xi apóstoles Jesús, Dios basial dunujn yayajcan zi'c ree bén ad lasajct, zi'c ree benmal ni rayal guialgüjt, abi' radxaløj ree anjl në ree bénguidxliuj dunujn.

<sup>10</sup> Abi' la'tgaj nayajcan zi'c ree bén ad yu't xquiarguiejn par bénguidxliuj guial ratie'chan xti-idxza'c Cristo, lëjt rlies xvaloridi guial rignia' da'tidi guial rliladxidi laaman. Dunujn nayajc zi'c bén ad yu't gojl guiáad lëjt naladxidi yu' da'tidi gojl

abi' rajp ree bejn lèjt respejt guiáad dunujn ad rënt reeman dunujn.

<sup>11</sup> Xt yandxej sta cayzaagdiajn por guialrliaan, guial re'c nijs nè guial ryaadx du xaban. Zienloj ni rüjnnè ree bejn dunujn, achet du lidxan.

<sup>12</sup> Abi' dád radxagan raguieenan dxiin din guidxel ni yadaawan. Chi ruzaal ree bejn di-idxmal du guijcan radxi'n nan con diidxza'c, abi' radaanan ni rüjnnètzi reeman dunujn.

<sup>13</sup> Abi' chi rnieeguijdx reeman dunujn, raneeza'cnè'n laa reeman. Xt yan nayajcan zi'c tijb guix par bénguidxliuj, nayajcan zi'c tijb ni ad rüjnt sirv par laa reeman.

<sup>14</sup> Ad cucatan gui'ch guie par gusa'nxtun lèjt, cucan laan din gunen lèjt consejw zi'cgajc da xi'n reen guial rënan lèjt.

<sup>15</sup> Din majsi gapidi zi'c chii mil ree bèn gusiid lèjt, per najzi naj zi'c tijb Dad par lèjt. Din por naj guzuloj rliladxidi Jesucrist chi basidan lèjt xtiidxza'c aman.

<sup>16</sup> Zeel rniaaban lojdi din guibandi zi'c naban.

<sup>17</sup> Din par zian rxhialan Timoteo guitixlojman lèjt, bèn rënan zi'c da xi'n nan laaman diidxli rliladxaman Jesucrist. Laaman gusaaladx lèjt xhienaag naban guial rliladxan Jesucrist, din zi'c naban naj ni cusidan bèn rliladx ree Jesucrist gra lod ran.

<sup>18</sup> Yu' ree xcompniaridi naladx guial ad zitixlotran lèjt abi' rlies xvalor reeman guial naban reeman zagdxe.

<sup>19</sup> Per Dios gunee permis din diob guitixlon lèjt dxel gagbeen wali reeman ya naban reeman zi'c rniee reeman o rnieez reeman.

<sup>20</sup> Din guial guiban zi'c rniabee Dios ad najtan diidxzi, rayal güün bejn zi'c rniabee Dios con xguialrniabeeman.

<sup>21</sup> Yan, ¿conin rëndi günan chi guitixon læjt, gadilë'n læjt ya o guiënan læjt ganenë'n læjt diidxza'c?

## 5

### *Xhienaag gac con bén rüjn tijb dol*

<sup>1</sup> Ma bacagdiagan guial tijb læjt bén riladx ree Jesucrist nabannë xnarojpidi zi'c lacheelidi, ni'quiza ree bén ad nünbeet Dios ad rüjnt lasa' dol guin.

<sup>2</sup> Abi' læjt rüjn di benro', luar rüjn di benro' gol guyunaya gol babëë tëë bén guin loj di.

<sup>3</sup> Majs i ad za'tan con læjt, per rünan xgab por læjt zi'cgajc rulüü za'n con læjt, abi' ma benchaawan xgab xhie rayal bén rüjn dol guin.

<sup>4</sup> Zi'c guialrniabee ni baneë Jesucrist naj, naj rni læjt: “Gol bachajg lasa'di.” Dxel gol gunaladx guial za'n con læjt abi' por xguialrniabee Dad Jesucrist,

<sup>5</sup> gol been bén guin tiblax, gol basa'nman loj xinxab din gagnaaman o sagdiajman por ni cayünman din gacaman perdon dxej ni gui't dux Dad ree Jesucrist.

<sup>6</sup> Ad nixtan guial rlies xvalorgajquidi abi' rtiëjbidi rajc lasa' ree dol guin. Gol gogbee guial zi'c rüjn levadur cob par guiadxtil ziangajc con tijb bén güün dol ma zë gajcan zian con gra ree lasa'di.

<sup>7</sup> Zeel gol been naguiejn din gaquidi naya zi'c cob harin ni ad yu't levadur gui'c. Din zi'c bagüjt ree bejn tijb xiil lanij pascw din yaya xtol reeman,

ziangajc dunuj ree por xguialgüjt Jesucrist ma naya ree loj Dios.

<sup>8</sup> Abi' guial yabaa ree por zian naj guial yabajn ree guidib du luxdoo ree zi'c rayal, zi'c guiadxtil ni ad no'cht levadur, luar yabajn ree con ree ni mal në ree dol zi'c babajn ree yaløj.

<sup>9</sup> Abi' zi'c ma rnin lojdi loj stijb gui'ch ni ma guxhalan lojdi, ad guchajguidi bën naban ree nadxuudx.

<sup>10</sup> Ad canenë'tan lëjt zian por ree bën ad rliladxt Dios, bën naban ree nadxuudx o rzëëbladx reeman ni ruguiaa'tzi reeman o naj reeman gubaan o rën reeman ni ren luar guiën reeman Dios, din bal zianan dxel ryaadx yariidi loj guidxliuj guie.

<sup>11</sup> Bën ni canin lëjt naj ree bën ni rëb naj ree xcompniaridi, bën rliladx ree Jesucrist abi' naban reeman nadxuudx, o rzëëbladx reeman ni ruguiaatzi reeman, o rën reeman ni ren ree luar guiën reeman Dios, o rbëë reeman xtiidx bejn, o naj reeman bengu', o béngubaan. Xcompniaridi bën naban ree zian ni'quid rayalt gawnëdi laa reeman.

<sup>12-13</sup> Ad da cwenttan naj ganen por ree bën ni ad najt dux compniar ree loj ni raliduladx ree Jesucrist bal rajp reeman dol o ad rajpt reeman dol, Dios naj bën güün guialguxtis con laa reeman, per dux cwent ree naj guial yazuxnejz ree bën naj ree dux compniar ree bën rliladx ree Jesucrist. Zeel gol babëë bën cayüjn dol entr lojdi.

## 6

*Chi yu' wadijl entr ree bën rliladx Jesucrist*

1 Zi'c chi xhie rzajcnë tijb xcompniaridi bèn rliadx Jesucrist, ¿chexc zeel rëjdi loj guxtis din yabëëxnejzaman ni rzajquidi luar chedi loj ree xcompniaridi bèn rliadx ree Jesucrist?

2 ¿Id rliadxidi ya guial yu' dxej bèn rliadx ree Jesucrist laa reeman naj bèn güün xguialguxtis loj ree bénguidxliuj? Abi' bal yu' dxej güün xguialguxtis reeman loj bénguidxliuj, ¿chexquiza zeel ni ad nawëëgt ni rzajc ree xcompniaridi ad rajct rabëëxnejzidi?

3 ¿Id ragbeedi ya guial xt loj ree xianjl Dios yu' dxej yaya'p ree guialrniabee? ¡Abi' xt mazri zile' yalëëxnejz ree ni cayza'c ree loj guidxliuj guie!

4 Zeel zi'c chi xhie rzajcnë lasa'di, ¿chexc zeel zëdi loj ree bèn ad najt xbejn Cristo din yabëëxnejz reeman ni rzajquidi?

5 Canin lëjt ni guin ree din yatu lojdi. ¿Wen nid yu'czi tijb lëjt zajc yabëëxnejz ni rzajc lasa'di ya?

6 Per lëjt luar güündi zian aal rudëëd lasa'di loj ree bèn ni ad rliadxt Dios.

7 Abi' natun guial gudëëd xcompniaridi loj guxtis guial cadilidi, mejorli gol gudaan ni rüjnnë reeman lëjt. Mejrli tiëbidi cuan reeman xieendi.

8 Per luar güündi zian, lëjtli cayüjn ree ni mal guin con ree xcompniaridi bèn rliadx ree Jesucrist. Rtia'di xieen reeman abi' rüjnnëdi laa reeman ni ad rayalt güünnëdi laa reeman.

9 ¿Id ragbeedi ya guial bèn naj ree benmal ad zut reeman loj xguialrniabee Dios? Gol gogbee guial loj xguialrniabee Dios ad zut ree bèn ni naban ree nadxuudx, në ree bèn rën ree ni ad najt ree Dios, në ree bèn za'në bèn ad najt lacheel reeman, në ree

xinguaaaw rüjn zi'c béngunaa nē ree xin rēn lasa' xinguaaaw zi'c béngunaa.

<sup>10</sup> Nē ree béngubaan, nē ree bèn rzëëbladx ni ruguiaatzi reeman, nē ree bengui' con ree bèn rnieeguidx bejn, nē ree bèn raguiil xhienaag chiquied reeman xieen bejn, ad zut reeman loj xguialrniabee Dios.

<sup>11</sup> Yu'di gubajn zian guia'xchej, per yan ma nayadi delant loj Dios, ma najdi par Dios, abi' ma nayabidi zi'c tijb bèn ni ad wayüjnt dol por xguialrniabee Dad Jesucrist nē por xSprijt Dios bèn ma nabannēdi.

### *Dux cuerp ree naj par Dios*

<sup>12</sup> Walican zajc yaguieen ree zi'ctzi rayēn ree, per ad gratan naj zagdx par güün bejn. Zajc güünan zi'ctzi rēnan, per ad zatiëëbtan xhie nabee naj.

<sup>13</sup> Yu' ree bejn rēb: “Guialraw naj par lēn bejn, abi' lēn bejn naj par guialraw.” Walican, per gunidloj Dios grop ree ni guin. Per ad walitan guial xcuerp bejn naj par güünman ni dxuudx ree con bèn ad najt lacheelaman. Din dux cuerp ree naj par Dios, abi' laaman rniabee dux cuerp ree.

<sup>14</sup> Dxel zi'c basban Dios dux Dad ree Jesucrist, ziangajc yasbanman dunuj ree por xguialrniabee-man.

<sup>15</sup> Gol gogbee guial ma najdi tijbzi con Cristo, guial dux cuerp ree ma naj tibia' xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yunē' ree tijb béngunaa dxuudx? ¿Ad rayalt gac zian!

<sup>16</sup> ¿Nid ragbeedi ya guial chi runē bejn tijb bèn ni ad najt lacheelaman, dxel ma najman tijbzi con

bendxuudx guin? Lëjt ragbee guial loj xtiidx Dios rëb: “Grop reeman ma naj tijbzi.”

<sup>17</sup> Per bèn ni ma naj tijbzi con dux Dad ree Jesucrist, najman tijbzi con laaman por xSprijt Dios.

<sup>18</sup> Gol gojp da't cudad ad güündi ni dxuudx ree con bèn ad najt lacheelidi. Xhietëez dol ren ad ruxhiintan xcuerp bejn zi'c rxin xcuerpaman chi rüjnman ni dxuudx con bèn ad najt lacheelaman.

<sup>19</sup> Din gol gogbee guial lëjt naj xyadoo xSprijt Dios bèn ma baneeman lojdi, dxel zian zi'c ma nabandi con xSprijt Dios ad rniabeetri lëjt gajc.

<sup>20</sup> Din par zian gudijx Jesucrist por dunuj ree chi gütaman loj crüjz. Zeel gol beennë xcuerpidi dxiin par güündi Dios bèn zojbloj, din laaman naj bèn rniabee lëjt.

## 7

### *Consejw xcwent guialruxhliaa*

<sup>1</sup> Yan, yadxi'n diidx xcwent ni gunabdiidxidi naj loj gui'ch ni guxhaalidi lon. Naj rni zagdxe naj guial ad zuxhliaat bejn.

<sup>2</sup> Per chitëë güün bejn dol con stijb bejn, zagdxen guial tijb gaj xinguaaaw chu' lacheel o tijb gaj béngunaa chu' lacheel,

<sup>3</sup> din gudëë xinguaaaw guin gust lacheelix abi' béngunaa guin gudëezaman gust lacheelaman.

<sup>4</sup> Din chi ma baxhliaa tijb béngunaa ad laatraman rniabee xcuerp, xinguaaaw guin naj xin rniabee laan. Ziangajc chi ma baxhliaa xinguaaaw, ad rniabeetri xcuerpix, béngunaa guin ma rniabee laan.



<sup>5</sup> Zeel xinguaaaw nē béngunaa ad rayalt gudxoon xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxej din cwedx guiniabidi Dios, zagdxen. Per chi ma gudēd ree dxej guin, gol bachajg lasa'di stijb chitēē güün xindxab lējt gan con ree xixgabidi.

<sup>6</sup> Ad canitan lojdi guial najczi guxhliaa bejn, per ad ni maltan guial guxhliaadi.

<sup>7</sup> Da xgaban naj guial xi nix gra ree bejn gac zi'c naj, per tijb gaj bejn ma bazaladx Dios xquiar-guiejnman guial xhienaag guibanman, bal guxh-liaaman o bal id zuxhliaaman.

<sup>8</sup> Par ree bèn xtijb nē par ree béngunaa bizējb, naj rni guial zagdxeli yaya'n reeman zi'c naj.

<sup>9</sup> Per bal id zadaan reeman guial ad zuxhli-aat reeman, dxel zagdxeli guxhliaa reeman luar gudēēd xcuerp reeman casti guial taan reeman.

<sup>10</sup> Guíaad ree bèn ma baxhliaa, ad da diidxntan ganin lojdi, xtiidx dux Dad ree Jesucristan guial ad zaro'nt béngunaa lacheelaman.

<sup>11</sup> Per bal tio'n lacheelaman ad rayalt guxhli-aanēman xin ren, zagdxeli naj yachajg lasa' ree-man stijb. Ziangajc xinguaaaw ad najt yala' lacheelix.

<sup>12</sup> Yan, ni ganin ad ni guneeet dux Dad ree Jesu-cristan, per naj rni lojdi: Bal yu' xinguaaaw rliladx Jesucrist abi' lacheelix ad rliladxt, abi' bal par béngunaa guin achet güünan, dxel ad najt yala' lasa' reex.

<sup>13</sup> Ziangajc bal rliladx béngunaa guin abi' lachee-laman ad rliladxt, abi' bal par xinguaaaw guin achet güünan, dxel ziangajc ad rayalt yala' ree-man.

14 Din xinguaaw ni ad rliładxt Jesucrist, züjnle' Dios laax gual rliładx lacheelix. Guiáad béngunaa ni ad rliładxt Jesucrist züjnle' Dios laaman gual rliładx lacheelaman, zian güünle' Dios xi'n reex. Din bal id naj zian, ad nayabt xi'n reex loj Dios zi'c tijb bèn ni ad wayüjnt dol.

15 Per bal xinguaaw o béngunaa ni ad rliładxt Jesucrist rënman yala' lacheelaman gual rliładx lacheelaman Jesucrist, yala'ri reeman. Bén rliładx ad zajt güünman naguejñ guibannë lacheelaman laaman din ad gurejdx Dios dunuj ree par yabajñ ree con wadijl.

16 Din béngunaa guin ad ragbeetaman bal güünman gan chililadx lacheelaman, o bal xinguaaw guin ma rliładx dxel ni'qui laax ad ragbeet bal güünx gan chililadx lacheelix.

17 Naj rni gual tijbgaj ree bèn ni ma rliładx Jesucrist rayal guiban reeman loj guidxliuj guie zi'c ma bacaabee Dios laa reeman, yaya'n reeman zi'ctzi naj reeman chi guzuloj rliładx reeman Jesucrist. Zianan naj ni cayën loj ree dux compniar ree bèn rliładx ree Jesucrist güün reeman.

18 Bal tijb bejn chi guzuloj rliładxaman Jesucrist mal yu'man sen ni ru ree bèn Israel, yaya'nraman zian. O bal id yu'man sen guin chi guzuloj bililadxaman Jesucrist, ad najt chu'man sen guin.

19 Din achet güünan bal yu' bejn sen guin o ad yu'taman sen guin, ni mazri lasajc naj gual güünman zi'c rniabee Dios.

20 Zeel gol baya'n zi'c najdi chi guzuloj bililadxił Jesucrist.

21 Bal najl zi'c bèn nado' chi guzuloj bililadxił

laaman, ad najtan ni chu'l xgab xhienaag güünl. Per bal zile' ad zajc tril zi'c bèn nado', mazri zagdxé barii loj ni najl zi'c bèn nado' guin.

<sup>22</sup> Bèn ni naj zi'c bèn nado' chi guzuloj bililadxaman Cristo ma najman zi'cgajc bèn ni ad najt zi'c bèn nado' par güünman sirv loj Cristo. Abi' bèn ni ad najt zi'c bèn nado' chi guzuloj bililadxaman Cristo, dxel Cristo ma rniabee laaman.

<sup>23</sup> Lèjt ragbee guial ma gudijx Jesucrist zro' por lèjt, yan ma najdi par Dios. Ad rayalt tièbidi nabee ree bénguidxliuj lèjt con ree ni rusquiee.

<sup>24</sup> Zeel rnin lojdi compniar raliduladx ree Jesucrist, gol baya'n zi'c najdi chi guzuloj bililadxidi Jesucrist.

<sup>25</sup> Yan lèjt bèn ad waxhliaat ree, dux Dad ree Jesucrist achet rëbaman por zian. Per naj zajc gunen lèjt consejw xhienaag güündi, abi' da xgaban naj guial zaliladxidi ni ganin lojdi din guial raya Dios naj bacaabeeman naj cayünan mandad ni cayünan.

<sup>26</sup> Zeel naladxan guial zi'c naj tarbajw ni caydüüd ree yan, zagdxeli naj guial ad zuxhliaatidi.

<sup>27</sup> Bèn ni ma baxhliaa ad najt gusa'n lacheelaman. Guiáad bèn ni ad waxhliaat ad rayalt güünman nagueijn guxhliaaman.

<sup>28</sup> Per bal rüjn l xgab guxhliaal, ad dolt naj guxhliaal. Ziangajc ree biinxdüb ni rën guxhliaa, ad dolt naj guxhliaa reem. Per rugojnan lèjt guial zienloj naj ni rzajc bèn ruxhliaa, abi' laan ad rëntan saquidi.

<sup>29</sup> Ni rënan gagbeedi naj guial ma caydop ree dxej ni zio'p ree loj guidxliuj guie par yagueien ree xmandad Dios. Zeel bèn ni ma baxhliaa ree gol

been sirv Dios xt lod guneetzan lèjt zi'cgajc ree bèn ni ad waxhliaat.

<sup>30</sup> Ni'qui guialrabaa, ni'qui guialrunaya, ni'qui guial rajp bejn xhienin loj guidxliuj guie achet zajc gudxoon guial güün bejn xmandad Dios.

<sup>31</sup> Bèn ni ad ryaadxt ree xhienin loj guidxliuj guie, gol gunaladx guial achet rajpidi, din gra ni yu' loj guidxliuj guie najn ni rdöd.

<sup>32</sup> Ni rënan naj guial ad zutidi xgab por ree ni yu' loj guidxliuj guie. Tijb xinguaaaw xtijb mazri rüjnx xgab por xmandad Dios, mazri rüjnx naguiejn güünx zi'c ruladx Dios.

<sup>33</sup> Per tijb xinguaaaw ni ma baxhliaa mazri rüjnx xgab por ree ni yu' loj guidxliuj guie, par laax mazri rüjn naguiejn yabaanë lacheelix laax.

<sup>34</sup> Dxel tio'p ma naj xixgabix, por Cristo në por xbéngunaax. Ziangajc tijb béngunaa ni ad waxhliaat mazri rüjnman xgab por ree xmandad Dios guidiblagaa rüjnman sirv loj Dios par güünman zi'c ruladxaman. Per tijb béngunaa ni ma baxhliaa mazri rüjnman xgab por ree ni yu' loj guidxliuj guie, mazri rüjnman naguiejn yabaanë lacheelaman laaman.

<sup>35</sup> Gra ni canin lojdi, canin laan par günan lèjt yudar ad par gudxontan guxhliaadi, caninan din guibandi zi'c rayal xnejz dxel gol been gol gubajn tëë zi'c rën dux Dad ree Jesucrist sin guial gudxoon xhienin lèjt.

<sup>36</sup> Chutëëz xinguaaaw rüjn xgab guxhliaanë biin rnieenëx abi' bal ma yu' biingunaa guin ijz par guxhliaam, güünri reex ni naladx reex naj zagdxe par laa reex. Bal guxhliaa reex, guxhliaari reex. Ad doltan guial guxhliaa bejn.

<sup>37</sup> Ziangajc chutëez bèn ni ad rüjnt xgab guxh-liaa, ad rayalt güünman xgab guial rüjn naguiejn guxhliaaman bal ma beenman xgab zagdxe guial ad zuxhliaataman. Din zagdxe gajcan bal id zuxh-liaa bejn.

<sup>38</sup> Zeel rnin lojdi zagdxen guial chu guxhliaa, per mazri zagdxe bal id zuxhliaa bejn.

<sup>39</sup> Tijb béngunaa chi ma baxhliaaman, ad rayalt sunëman xinguaaw ren chi nabannë lacheelaman. Per bal guiët lacheelaman ma zajc tia' xin ren laaman per con tijb ree xcompniaraman xin rililadx Jesucrist.

<sup>40</sup> Per naladxan guial mazri zagdxe guibanman bal id zuxhliaaman stijb. Zian rünan xgab guial nabannë'n xSprijt Dios zi'cgajc lëjt.

## 8

### *Guialraw ni rbe'c ree bejn loj ni naladx reeman naj Dios*

<sup>1</sup> Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhien-aag yaguieen ree por ree ni guin, per yu' dxej por guialrignia' rlies bejn xvalor gajcaman. Per guialrën lasa' bejn lasajc mazri din por guial rën lasa' bejn zile' yaguieen yudar du lasa' ree din yasnuu yayignia' ree xhienaag rayal yabajn ree.

<sup>2</sup> Bal yu' bèn naladx guial ma bayaaloj rig-nia'man gra, cusquiee laagajcaman din ryaadx da'tri chignia'man.

<sup>3</sup> Per bèn ni rën Dios, Dios nünbee laaman.

<sup>4</sup> Yan por guial raw bejn guialraw ni ma gule'c reeman loj ree ni naladx reeman naj Dios, dunuj ree rayagbee guial achet guialrniabee rajp ree dios guin loj guidxliuj guie, din tijbzi Dios yu'.

<sup>5</sup> Majsi yu' ree bejn naladx guial yu' zien ree dios bèn rniabee xanyabaa në loj guidxliuj,

<sup>6</sup> per dunuj ree rayagbee guial tijbzi dux Dad ree Dios yu' abi' por laaman yu' gra ni yu' por laa tēēman nadxu' ree loj guidxliuj guie. Tijbzi Jesucrist naj Dad par dunuj ree abi' por laaman yu' gra por laaman tēē raya'p ree guialnaban.

<sup>7</sup> Per ad grat ree bejn rüjn xgab zian. Din yu' ree bèn ni guyēn graloj ni naladx reeman naj Dios, abi' yan guial qui bililadxri reeman Jesucrist naladx reeman guial dolan gaw tijb bejn guialraw ni ma gurej loj ree dios guin.

<sup>8</sup> Dunuj ree rayagbee guial ad ni rawt bejn rüjn guiban bejn mazri zagdxē loj Dios, lasa'gajcanan bal yadaaw ree o ad zadaawt ree lasa' ree guialraw guin.

<sup>9</sup> Per majsi lējt ragbee guial zajc gawidi xhi-etēēznin, rayal gapidi cudad ad güündi guial ree bèn qui rliladxri Jesucrist güün reeman dol.

<sup>10</sup> Din bal lüj guial achet naladxil rawil xhi-etēēznin, zøjbil cayawil guialraw ni ma gurej loj ree ni ad najt dios. Dxel guguiaa tijb ree bèn qui rliladxri Jesucrist lüj abi' nēgajcaman sēēbladx gaw guialraw guin majsi lēn luxdooman naladxaman guial ad zagdxet naj ni cayüjnman.

<sup>11</sup> Dxel por xguialrajquil cayüjnl guial güünman dol guial ad nixt yu' luxdooman cayawaman ni guin ree, per badxe'guijc guial në por laaman güjt Jesucrist loj crüjz.

<sup>12</sup> Zeel bal rüjnl tijb ni naj ni mal par ree bèn qui rliiladxri ree Jesucrist abi' rüjn reeman dol por lüj, dolan cayüjnl delant loj Cristo.

<sup>13</sup> Bal por tijb ni rawan rüjn ree da compniaran dol, mejorli ad zawtran laan chitëë güünman dol por naj.

## 9

### *Ni zajc güün tijb apóstol*

<sup>1</sup> Lëjt ragbee guial zajc günan ni rënan por guial-rniabee ni ra'pan guial najn apóstol. Ma baguiaan dux Dad ree Jesucrist abi' lëjt naj ree bèn ni ma be-nan gan par laaman guial ma bililadxidi laaman.

<sup>2</sup> Bal yu' ree bèn ni ad nünbeet naj zi'c apóstol, per lëjt ragbee guial apóstol najn. Din zi'c ma rliiladxidi Jesucrist dxel ma rguien guial diidxli najn apóstol.

<sup>3</sup> Abi' par ree bèn ad rliiladxt guial najn apóstol, ze naj ni rën loj reeman:

<sup>4</sup> Ra'pan derejch gunee reeman ni gawan në ni guië'n.

<sup>5</sup> Abi' zajc tëë guxhlian con tijb béngunaa naj dulasa' raliduladx ree Jesucrist din chinë'n laa-man bantëéz guin gan, zi'c rüjn los demazri ree apóstoles con ree bijch Dad Jesucrist në Bëd.

<sup>6</sup> ¿O najzi con Bernabé bayal yaguieenan xman-dad Dios dux cwentan ya?

<sup>7</sup> Per ni'qui tijb suldad ad rejt loj wadijl xcwen-taman, yu'czi bèn rguijx xgaxtaman. Ziangajc bèn rxübin uv, ¿wen id zajc gawaman laan ya? Laadx bèn ni rajp vag ree, ¿wen id zajc guië'man xlejch reeb ya?

<sup>8</sup> Abi' ad xixgabtzi bénguidxliujn canin lojdi, nè loj ley ni badëë Dios loj Moisejs rëb zian.

<sup>9</sup> Din loj ley guin rëb: “Ad gudxe'di guiixh ro' ree be gui'xh la'tgaj cayüjn reeb dxiin.” Ad rëbt Dios zian guialzi yu'man laa reeb xgab,

<sup>10</sup> rëbaman zian por dunuj ree. Din zi'c bèn rlia' yuj zi'c bèn rusia trigo, grop reeman yu'guijc guial yu' ni yaca' reeman.

<sup>11</sup> Yan ma balün lëjt xhienaag chinalidi xnejz Dios, ¿wen zro' da't yanaaban lojdi ya bal güüнди dunujn yudar din gusnuu dux guialnabanan?

<sup>12</sup> Bal stijb ree bèn ni rusiid lëjt rila' rtia' reeman ni rayal gudëëdidi loj reeman, dxel ziangajc dunujn raya'pan mazri derejch güüнди dunujn yudar.

Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chitëë xhie cwib guiyc guial ad zucaagdiajgtri ree bejn xtiidxza'c Jesucrist.

<sup>13</sup> Lëjt ragbee guial gra ree bixhioz ni rüjn sirv lën xyadoo Dios, rtia' reeman tibda'n ni rinë ree bèn Israel loj Dios persi rila' rbajn reeman. Ziangajc gra ree bixhioz ni rüjn ree sirv lule' yadoo guin lod rinë ree bejn be ree par Dios, nè reeman rtia' ta'n ni rinë ree bejn persi rila' rbajn reeman.

<sup>14</sup> Yan laagajcan rëb dux Dad ree Jesucrist por ree bèn ni rulüü xtiidxza'caman, guial por ree bèn ni rulüü reeman rayal guiban reeman.

<sup>15</sup> Per naj achet caca'n, ad caxhal tëëtan gui'ch guie lojdi din guneedi xhienin. Din par naj zagdx-eli naj guiëtan luar chu' bèn chiquied guialrabaa guin luxdon guial cusidan bejn ree xtiidxza'c Jesucrist.



16 Ad rayalt gales da valor gajcan guial cusidan bejn ree xtiidxza'c Jesucrist, din mandad guin naj ni bayalan. ¡Prob naj bal idan gusid bejn ree diidxza'c guin!

17 Zeel bal cayünan mandad guin guial ruladxan gūnan laan, dxel yu' ni gaca'n. Per ni'qui bal id ruladxan gūnan mandad guin, laan bayal gūnan.

18 Abi' ni rūnan gan naj guialrabaa ni yu' luxdon majsi ad naxtan, majsi ad caca'tan ni rayal tia' bën ni rulüü xtiidxza'c Jesucrist, per cusnuu culün diidxza'c guin ree bejn ree.

19 Abi' majsi ad yu't bën rniabee naj por mandad guin, per laa naj guie par gra ree bejn din gac gūnan sirv xbejn Cristo.

20 Abi' chi za'n con ree bën Israel, rūnan naguiejn persi yu'guijc reeman guial nayajcan bën Israel din gūnan gan gac reeman xbejn Cristo. Chi za'n con ree bën Israel bën rüjn ree naguiejn chinal xley Moisejs dxel rūnan zi'c bën zinal ley guin, din gūnan gan gac reeman xbejn Cristo, majsi ragbeen guial ad rniabeet ley guin naj.

21 Abi' chi za'n con ree bën ad najt bën Israel, bën ad zinalt ree ley guin dxel majsi ragbeen guial Dios naj bën rniabee naj guial nabanen zi'c rniabee Cristo, per rūnan naguiejn din guguaaa reeman naj zi'cgajc tijb lasa' reeman din gac gūnan gan gac reeman xbejn Cristo.

22 Chi za'n con ree bën yu'nawëög par güün reeman o gaw reeman xhienin, dxel rūnan naguiejn din su reeman zagdxé con naj din gūnan laa reeman yudar gac reeman xbejn Cristo. Bantëöz lod ran rūnan naguiejn din guguaaa reeman naj zi'cgajc tijb lasa' reeman, din günczan gan majsi

ta'nzi reeman g nan gan gap reeman perdon por Cristo.

<sup>23</sup> Gra ree ni guie cay nan guial r nan xtiidxxa'c Jesucrist, din tiblojzi g nle' Dios naj con gra ree b n rliadx diidxxa'c guin ree.

<sup>24</sup> L jt ragbee guial chi yu' tijb carrer zien bejn rux n, per tijbzaman naj b n rtia' prem. Zian-gajc l jt gol been naguiejn tia'di ni gunee Dios.

<sup>25</sup> B n ni rux n ree rajp laagajc reeman cudad chit e xhie gudxoon gux n reeman. R jn reeman zian din g n reeman gan, abi' ni r jn reeman gan naj tijbzi coron balag ni rigool cari. Per dunuj ree ni cayguieen ree naguiejn cayca' ree najn tijb prem ni ad yu't dxej nit.

<sup>26</sup> Abi' ragbeechaawan xhienin cay nan, ad cay ntan zi'c tijb b n ni rux n sin guial gagbeen chexc, ad r ntan zi'c tijb b n ni rga'p sin guial gagbeeman ban ca'paman.

<sup>27</sup> Zeel cusagdiaj naj gajc din gac ganabee naj gajc g nan zi'c rayal g nan, chit e guial cul n bejn ree xtiidxxa'c Jesucrist achet yayalan delant loj Dios.

## 10

### *Guial r n ni ad najt ree Dios*

<sup>1</sup> Compniar raliduladx ree Jesucrist, gol basaal-  
adx guial dux bengol gulal ree b n binal ree Moisejs, gra reeman guza xan zaj ni guxhaal Dios abi' gra reeman gud d loj nijsdoo ni la nijsdoo xnia.

<sup>2</sup> Zian biguien guial xbejn Moisejs naj reeman din gra reeman guzan  laaman xan zaj guin, abi' gud d reeman con laaman loj nijsdoo guin. Zian gurobnijs reeman loj zaj guin n  loj nijsdoo guin.

<sup>3</sup> Gra tää reeman gudaw guialraw ni bi't diizd xanyabaa.

<sup>4</sup> Gra tää reeman gu' nijs ni bazaladx Dios loj reeman, nijs brii lad tijb guiaj. Rën guiëban guial diizd nadxel mal naban Cristo con laa reeman lod zëtzi reeman.

<sup>5</sup> Per zien reeman ad beent zi'c ruladx Dios, abi' güjt reeman niz loj yujbidx niz lod guza reeman.

<sup>6</sup> Gra nine gojc din yayagbee ree guial ad laat yaguieen ree lasa' ree ni mal ni been reeman.

<sup>7</sup> Ad rayalt yayën ree ni rëb ree bejn naj ree Dios zi'c been zien ree dux bengol gulal ree, din rëb loj xtiidx Dios xcwent reeman: “Gurej reeman, gudaw reeman dxel bisu reeman been reeman ni dxuudx ree.”

<sup>8</sup> Ad rayal tääet güün bejn ni dxuudx con bèn ad najt lacheelaman, zi'c been zien ree dux bengol gulal ree abi' tijb dxej güjt gajlbichoon mil reeman.

<sup>9</sup> Ad zaneeguijdx tääet ree Dios zi'c been zien ree bèn guin, abi' gudaw bëel laa reeman persi güjt reeman.

<sup>10</sup> Ad rayal tääet yaguie'ch ree guial ad cayüjnt Dios zi'c rayal, din zian been zien ree dux bengol gulal ree abi' guxhaal Dios tijb anjl bagüjt laa reeman.

<sup>11</sup> Gra ni guzac reeman cwan loj xtiidx Dios din yayagbee ree guial ad laat yaguieen ree zi'c been reeman, dunuj ree guial nabajn ree yan guial ma caydop dxej ni yadëed ree bejn cwent loj Dios.

<sup>12</sup> Zeel bèn ni naladx za'dxi'ch loj xnejz Dios, mejorli gapaman cudad chitää güün dol laaman gan.

<sup>13</sup> Gra ni cazajquidi ad najtan ni ad rzajct bejn,

din Dios ad zaro'nladxtaman lëjt. Ad zuslaat Dios saquidi tijb ni ad zadaantidi, abi' laaman güün lëjt yudar din gagbeedi xhienaag laadi loj ni cayajc.

14 Zeel compniar raliduladx ree Jesucrist, zi'c rënan lëjt rnin lojdi gapidi cudad ad goc guiëndi ni naladx ree bejn naj dios.

15 Naj ragbee guial najdi ganax bèn rignia', zeel lëjt gajc gol been xgab bal zagdxen naj ni canin lojdi.

16 Chi raguieen ree zi'c been dux Dad ree Jesucrist chi gudaw reeman guxhin bigra, dxel chi radü' ree vin ni ma gogle' rasaaduladx ree rejn ni ma guxhie'man chi gütaman por dux tol ree. Abi' chi radaaw ree guiadxtil zi'c beenman, laan naj tijb sen guial ma nayajc ree tijbzi con laaman.

17 Din majsi zien nayajc ree, per zi'c rlia' tijbzi guiadxtil par dugra ree, zian rguien guial ma nayajc ree tijbzi con Cristo.

18 Lëjt ragbee xhienaag rüjn ree bèn Israel chi rinë reeman tijb gon par Dios, abi' zi'c raw reeman tibia' gon guin yu'guijc reeman guial ma naj reeman tijbzi con Dios.

19 Ad canitan lojdi por ree ni naladx ree bejn naj dios guial lasajc reen o guial lasajc guialraw ni gurej loj ree dios guin.

20 Din bèn rüjn ree zian ad lojt Diosan rbe'c reeman guialraw guin ree, loj xindxaban rbe'c reeman laa reen. Abi' ad rëntan gaquidi tijbzi con ree xindxab guin.

21 Ad zacjt güüdi zian par guiguien guial ma najdi tijbzi con ree xindxab guin, abi' gaw tëedi guiadxtil con vin din guiguien guial ma najdi tijbzi con Cristo.

22 ¿O rëndi ya yache'ch ree Dios? ¿Wen mazri raya'p ree guialrniabee guial lojman ya?

### *Xhie zajc güün ree xbejn Dios*

23 Graczi zajc güün bejn, per ad gratan naj zagdx e guial güünman. Majsi gra zile' güün bejn, per ad gratan rüjn sirv par güün lasa'man yudar chinalaman xnejz Dios.

24 Din ad rayalt yaguieen ree xgab por dunujzi ree, rayal yaguieen ree xgab por ree dux compniar ree.

25 Zi'c chi rziidi bëel luguia', ad guiniabdiidxiidi bal ma gurejn loj xdios reeman, chitëë xhie guinialadxiidi chi gawidi laan.

26 Din xieen dux Dad ree Dios naj guidxliuj con gra ni yu' lojn.

27 Bal tijb bèn ad waliladxt xtiidxi Dios na lojdi guial chitawidi lidxaman, abi' bal rëndi chedi gol chej. Gol gudaw gra ni gunee reeman lojdi ad xhie guiniabdiidxiidi chitëë xhie naladxiidi.

28 Per bal yu' xcompniaridi na guial ni cunee bèn guin cayawidi ma gurejn loj xdiosaman, ad gawidi laan por bèn bagojn lëjt chitëë güünman xgab mal guial ad laat cayüjndi, majsi lëjt ragbee guial xieen dux Dad ree Dios naj guidxliuj në ni yu' loj guidxliuj guin.

29 Ad canitan lëjt xcwent guial xhie naladxiidi, ni canin lëjt naj por ree xgab ni zajc güün stijb xcompniaridi por lëjt.

Per wed yu'di rüjn xgab: “Per, ¿chexc zeel ad züntan gra ni ragbeen ad najt ni mal por xixgabzi stijb bejn?

<sup>30</sup> Wed rëb tēedi: Naj ragbee guial rudën quixtëe loj Dios por gra ni rawan, ¿chexquiza zeel güün reeman xgab mal por naj?”

<sup>31</sup> Per naj rni lojdi gra ree ni guin rayal gudxe'guijquidi din zi'c ni rawidi zi'c ni rē'di nē gra ree ni rüjndi rayal güündi laan par güündi Dios bèn zojbloj.

<sup>32</sup> Gol gojp cudad xhienaag nabandi din zi'c ree bèn Israel zi'c ree bèn ni ad najt bèn Israel con ree xcompniaridi bèn rliladx ree Jesucrist ad züjnt reeman xgab mal por lëjt.

<sup>33</sup> Din zian rünan, rünan naguiejn chitëe xhie naladx bejn con naj. Ad rüntan ni rüjnzi naj yudar, rünan naguiejn din günan ni rüjn yudar zien ree bejn din gac gap reeman perdon loj Dios.

## 11

<sup>1</sup> Zeel gol binal zi'c rünan, zi'c zinaalan zi'c been Cristo.

*Xhie rayal güün ree bejn chi rbejdx rniab reeman Dios*

<sup>2</sup> Naj dád rabaanë'n lëjt guial rusaaladxidi naj, guial yu'guijquidi rüjn tēedi zi'c balün lëjt.

<sup>3</sup> Rën tēen gusaaladxidi guial Dios rniabee Cristo abi' Cristo rniabee xingüiaaw abi' xingüiaaw rniabee béngunaa.

<sup>4</sup> Tijb xingüiaaw chi rgu' xhienin guijquix par cwedx guiniabix Dios o gulüüx xtiidx Dios, natu naj ni cayüjnx.

<sup>5</sup> Ziangajc chutëez béngunaa cabejdx canab Dios o culüüman bejn ree xtiidx Dios, abi' achet xoob guijcaman, natu gajc naj ni rüjnman. Güünman

cwent guial najman zi'c tijb béngunaa ni biaj guijc xt garej.

<sup>6</sup> Zeel bal tijb béngunaa ad rëntaman guixhioob xhienin guijcaman, gugajli guijcaman. Per bal ragbeeman, guial natun guiyaj guijcaman xt garej, mejorli guixhioob xhienin guijcaman.

<sup>7</sup> Per xinguaaw achet zajc chu' guijquix din Dios beenman laax zi'cgajczi laaman, zian rulüüx respejt ni rajpax Dios. Abi' béngunaa guial rxhioob xhienin guijcaman, zian rulüüman respejt ni rajpaman xinguaaw.

<sup>8</sup> Din ad gojct xinguaaw con guxtil lad béngunaa, béngunaa guin gojc con guxtil lad xinguaaw.

<sup>9</sup> Ad gojct xinguaaw par béngunaa, béngunaa guin gojc par xinguaaw.

<sup>10</sup> Zeel béngunaa rayal guixhioob xhienin guijcaman din guiguien guial xinguaaw rniabee laaman zi'c rulüü ree anjl chu rniabee laa reeman.

<sup>11</sup> Majsi delant loj Dios tiblojzi naj bejn, din bal id béngunaa niu achut xinguaaw niu, abi' bal id chu xinguaaw niu achut béngunaa niu.

<sup>12</sup> Walican, guial con guxtil lad xinguaaw gojc béngunaa, per yan por béngunaa ri't xinguaaw loj guidxliuj, zeel zi'c xinguaaw con béngunaa por Dios yu' reeman loj guidxliuj.

<sup>13</sup> Naj rni lëjt, lëjt gajc gol been xgab bal zagdxen cwedx guiniab tijb béngunaa Dios abi' achet naxhoob guijcaman.

<sup>14</sup> Bejn gajc ragbee guial natun bal id zugaj guijc xinguaaw.

<sup>15</sup> Per par béngunaa mazri zagdxe rguienman bal guyool guidxguijcaman, din rajpaman laan par

gusiaawan guijcaman.

<sup>16</sup> Bal chu ad za't conform por ni canin lojdi, per naj rugojn lëjt guial achet stijb costumbr raya'p ree, zian naj dux costumbr ree con los demazri ree bën rliladx xtiidx Dios.

*Ruxhiin reeman zi'c basa'n Dad Jesucrist gac*

<sup>17</sup> Yan xcwent ni ma ganin lëjt, ad zile't ganin guial zagdxe naj ni cayüjndi din chi radxaag lasa'di par cwedx guiniabidi Dios, al ni ad rayalt güüнди rüjndi.

<sup>18</sup> Yaløj rnin lojdi biguiejnan guial chi radxaag lasa'di par cwedx guiniabidi Dios ad raya'ntidi diidx, abi' tiblاد rliladxanan.

<sup>19</sup> Din nawëëg najn guial ad zajct zian, abi' zian rguien chu diidxli zinal xnejz Dios.

<sup>20</sup> Per por zianzi, achetri sirv rüjn guial radxajg lasa'di par gawidi xche zi'c been dux Dad ree Jesucrist.

<sup>21</sup> Din tijbgajdi rüjn naguiejn diob gawidi, ad rbëjzt xcompniaridi. Abi' la'tgaj yu' ree bejn rli-aan, yu'di raw da't abi' xt rzüdxidi guial rë'di zi'ctzi rëndi.

<sup>22</sup> ¿Id yu' lidxidi ya lod gawidi guiè' tëëdi zi'ctzi rëndi?, ¿o ad rëntidi xcompniaridi bën rliladx ree xtiidx Dios ya, zeel rusa'nxtudi bënprob ree bën achet rajp? Yan, ¿rëndi ya chu' luxdon zagdxe con lëjt por zian? ¿Per zian zi'c cayüjndi, ad zajct ganin lojdi guial zagdxe naj ni cayüjndi!

*Ni bigra gudaw Jesucrist xche*

*(Mt. 26:26-29; Mr. 14:22-25; Lc. 22:14-20)*

<sup>23</sup> Abi' ni balün lëjt, basidan laan por dux Dad ree Jesucrist guial guxin ni bayü reeman laaman



chi bigra gudawaman xche, cwa'man tijb guiadx-til.

<sup>24</sup> Abi' chi gulox badëëman quixtëë loj Dios dxel gula'man guiadxtil guin, rëb gajman: “Guiadxtil guie naj da cuerpan ni ma bayün par guiëtan por lëjt. Abi' chi güüнди zian, gol beenan guial gusaal-axidi naj.”

<sup>25</sup> Ziangajc beennëman cojp ni yu' vin chi gulox gudaw reeman xche, dxel rëbaman: “Vin guie naj da rejnan ni gaxhie'n chi guiëtan par gaxhalan tijb nejz cüb guial xhienaag gac ree bejn perdon loj Dios. Abi' chi güüнди zian, gol been zian guial rusaalaxidi naj.”

<sup>26</sup> Zeel, beegaj chi radxaag lasa'di par gawidi xche zi'c been dux Dad ree Jesucrist, chi rawidi guiadxtil rë' tëëdi vin, zian rulüüdi guial güjtaman por lëjt, gol been zian xt chi gui'taman loj guidxliuj guie zatijb.

### *Xhienaag rayal gac xche*

<sup>27</sup> Yan bal yu' bèn raw guiadxtil rë' tëëman vin xche guin, abi' ad yu' guijctaman ni rën guiëb ni cayüjnman, dolan cayüjnman guial ad yu'guijctaman ni rën guiëb xcuerp në xrejn dux Dad ree Jesucrist.

<sup>28</sup> Zeel rayal güün bejn xgab xhienaag nabanman delant loj Dios dxel ma zajc gawaman guiadxtil guië' tëëman vin xche guin.

<sup>29</sup> Din bèn raw guiadxtil guin con vin guin abi' ad yu'guijctaman ni rën guiëb xcuerp Jesucrist. Laagajcaman caguuil xcasti.

<sup>30</sup> Din guial r jn ree bejn zian zeel d d ziendi ragxuu, zien t edi ad yu't gojl abi' zien reeman ma g jt.

<sup>31</sup> Per bal yalojxgaj yaguieen ree xgab xhienaag nabajn ree loj Dios dxel ma zajc yadaaw ree xche guin, achetri xcasti Dios yayal ree.

<sup>32</sup> Per ziangajc bal yu' xcasti Dios ni yayal ree, laan naj par guzuxnejzaman dunuj ree chit e yaguieen ree dol, chit e yayal ree casti ni rayal ree b n ad rliladxt xtiidxaman.

<sup>33</sup> Zeel compniar raliduladx ree Jesucrist, chi radxaag lasa'di par gawidi, gol gul jz ree xcompniaridi din gawidi tijbzi.

<sup>34</sup> Per bal yu'di ad zajct cw z guial ma rliaandi, zagdxeli gaw lidxidi chit e yayalidi xcasti Dios guial ad z jntidi zi'c rayal. Gra ni rayal ganin lojdi, chi guialan guidganan l jt dxel yanee ree.

## 12

### *Quiarguiejn ni runee xSprijt Dios*

<sup>1</sup> Yan ganin l jt, quiarguiejn ni runee Dios loj tijb gaj bejn por xyudar xSprijt Dios, din ad r ntan guibandi sin guial gagbeedi ni guin ree.

<sup>2</sup> L jt ragbee guial chi gadidi g nbee Dios dxel gogdxadi, bidxga'di ni na ree bejn lojdi naj ree dios abi'za ni'quid rnieet reen.

<sup>3</sup> Zeel gol gogbee, chut ez b n rnieeguijdx Jesucrist, r n gui ban guial ad nabann taman xSprijt Dios. Achu t et bejn zajc gui b: “Jesucrist naj b n rniabee naj!”, bal id nabanman con xSprijt Dios.

<sup>4</sup> Quiarguiejn rent quiarguiejn ren runee Dios dunuj ree, per Sprijt guin gajc naj b n ragn  dugra ree.

<sup>5</sup> Majsì ni rent ni ren naj xmandad Dios ni cayguieen ree, per laagajcaman naj bèn ni cayguieen ree sirv.

<sup>6</sup> Abi' majsì garent garen cayüjn tijbgaj bejn, Dios gajc naj bèn ni cayüjn yudar tiblojzi.

<sup>7</sup> Tijbgaj dunuj ree rulüü Dios ni rayal yaguieen ree con xyudar xSprijt Dios din yaguieen ree yudar dux compniar ree.

<sup>8</sup> Din con xyudar xSprijt Dios yu' ree bèn ma ca' quiargueijn par guiniee reeman, yu' tëë ree bèn ma ca' quiargueijn par chignia' reeman diidxli xcwent Dios.

<sup>9</sup> Abi' por xyudar xSprijt Dios yu' ree bèn ma cwa' guialrliladx ni guidiblagaa. Yu' tëë ree bèn ma cwa' guialrniabee par yayüjn reeman bènragxuu ree.

<sup>10</sup> Yu' tëë ree bèn ma cwa' guialrniabee par güün reeman gadxagayaa ree milagr. Yu' ree bèn ma ca' quiargueijn par gudëed reeman xtiidx Dios loj ree bejn. Yu' tëë ree bèn ma cwa' ree quiargueijn par gagbee reeman bal wali o ad walit ni canee bèn rëb guial caneeman xtiidx Dios. Yu' tëë reeman ma ca' quiargueijn par guiniee reeman gadxagayaa ree diidx, abi' yu' reeman ma ca' quiargueijn par yadëed reeman tijb diidx par stijb diidx.

<sup>11</sup> Per por xyudar gajc xSprijt Dios rüjn bejn ni guin ree, laaman ma ragbee conin rudëeman güün tijb gaj bejn ni naladxaman naj zagdx.

### *Tijbzi cuerp nayajc dugra ree*

<sup>12</sup> Din zi'c dux cuerp ree majsì zien la' najn, per tijbzi nayajc ree. Ziangajc dunuj ree guial

raliduladx ree Jesucrist majsi zien nayajc ree per tijbzi nayajc ree con laaman.

<sup>13</sup> Din dugra ree barobnijs por tijbzi xSprijt Dios par yayajc ree tijbzi con gra ree dux compniar ree majsi nayajc ree bèn Israel o ad nayajct ree bèn Israel, bal nayajc ree zi'c bèn nado' o ad nayajct ree zi'c bèn nado', per tijbzi ma nayajc ree din dugra ree tiblojzi nabajn ree con xSprijt Dios.

<sup>14</sup> Lëjt ragbee guial ad tibia'tzi naj xcuerp bejn, zien la' naj xcuerp bejn.

<sup>15</sup> Yan bal guiëb guia' bejn: “Ad najtan tibia' xcuerp bejn din ad najtan yaa bejn.” Per ad por ziant ad najt guia' bejn tibia'man.

<sup>16</sup> Ziangajc majsi guiëb guidiajg bejn: “Ad najtan tibia' xcuerp bejn din ad najtan guiaaløjman”, ad por ziant ad najtri guidiajgaman tibia' xcuerpaman.

<sup>17</sup> Din bal guidib xcuerp bejn niajc guiaaløjman, ¿xhieza naag niguiejnman?, o bal guidib xcuerp bejn niajc guidiajgaman, ¿xhieza naag niuxi'man?

<sup>18</sup> Per Dios ma ragbeeman banguin rayal guzoobaman tibia'gaj ni naj xcuerp bejn din gacaman zi'c rënman.

<sup>19</sup> Din bal niajc xcuerp bejn tiblojzi, dxel ad najtran cuerp.

<sup>20</sup> Per zi'c ma rnin lëjt majsi zien la' naj xcuerp tijb bejn per tijbzi naj guidiban.

<sup>21</sup> Ad zajct guiëb guiaaløj bejn loj yaaman: “Ad ryaadxtan lüj.” Ad zajct tëët guiëb guiyc bejn loj guia'man: “Ad ryaadxtan lëjt.”

<sup>22</sup> Din luar lod rulüü ad rüjnza'ct sirv, laa reen naj ni mazri rüjn sirv.

<sup>23</sup> Abi' ree luar lod ad rguient zagdx, raguieen ree naguiejn din guiguien reen zagdx. Gui'ad ree luar naguie'ch, mazri raya'p ree cudad luar guin ree rata'cw reen din guiguien reen zagdx.

<sup>24</sup> Ad zro't radxu' ree xgab por ree luar ni rguien, mazri raya'p ree cudad luar naguie'ch ree zeel radojt ree xhienin din guiguien zagdx dux cuerp ree. Zianan been Dios xcuerp bejn

<sup>25</sup> din chitëë yaguieen ree xgab guial yu' lod ad rüjnt sirv, guidib dux cuerp ree rüjn yudar lasa'.

<sup>26</sup> Chi rdoob tiblajt xcuerp bejn guidib xcuerp bejn rdoob, abi' bal nix yu' tiblajt xcuerp bejn guidib xcuerp bejn yu' nix.

<sup>27</sup> Yan ziangajc guial nayajc ree tijbzi con Cristo dugra ree nayajc ree zi'c tijbzi cuerp par laaman, tijb gaj dunuj ree nayajc ree tibia' cuerp guin.

<sup>28</sup> Abi' entr gra dux compniar ree bèn rliladx Jesucrist. Dios yaløj bacaabeeman bèn naj ree xi apóstoles Jesús, ni barojp bacaabeeman bèn gudëed ree xtiidxaman loj ree bejn, bayon bacaabeeman bèn gulüü ree xtiidxaman bejn ree, dxel bacaabeeman bèn gap ree guialrniabee par yayüjn reeman bènragxuu ree. Bacaabee tëëman bèn güün ree gadxagayaa milagr. Bacaabee tëëman bèn ni güün ree yudar bejn ree. Bacaabee tëëman bèn ni nabee ree loj ree bèn rliladx xtiidxaman abi' bacaabeeman bèn ni rníee ree zien ree diidx.

<sup>29</sup> Ad grat ree bejn naj apóstoles ad gra tët ree bejn zajc gudëed xtiidx Dios loj ree bejn, ad grat ree bejn zajc gulüü xtiidx Dios bejn ree. Ad grat ree bejn zajc güün milagr,

<sup>30</sup> ad gra tët ree bejn zajc yayüjn ree bènragxuu,

abi' ad grat bejn zajc guiniee zienloj diidx ad gra tēet bejn zajc yayüjn tijb diidx zatijb diidx.

<sup>31</sup> Per gol been naguiejn din gunee Dios lējt quiarguiejn zagdxee ree, abi' naj ganin lējt conin naj nejz mazri zagdxee chinalidi.

## 13

### *Xcwent guial rēn bejn ree*

<sup>1</sup> Din bal rajc rnien zienloj diidx ni rniece bénguidxliuj nē xtiidx ree anjl yu' xanyabaa, per bal id rēnan bejn najzan zi'c tijb guiib rzijdx o zi'c tijb plati ni yu' cha'.

<sup>2</sup> O bal nayalan nudēdan xtiidx Dios loj ree bejn, o nia'pan quiarguiejn par niagbeen gra ni zēēd por Dios ni gad gagbee bejn, o nia'pan zienloj guialrignia' o nia'pan tijb guialrliladx Dios ni xt zile' guchan xliajt ree guia', per bal id rēnan bejn ree achet lasajcan.

<sup>3</sup> Ziangajc majsi gagui'san gra ni ra'pan loj ree bèn ni ryaadx laan abi' yayü da cuerpan din che'can, per bal id rēnan bejn ree achet lasajc ni cayūnan.

<sup>4</sup> Guial rēn lasa' naj gap pacens lasa' bejn, gac bejn benza'c con lasa'man, ad zadēdlojt lasa' bejn, ad zūjnt bejn nabē, ad zūjnt bejn benro' loj lasa'man.

<sup>5</sup> Guial rēn lasa' naj gap respejt lasa' bejn, ad gac bejn naxhien, ad yalenyama, ad chu'xyajn tēē lasa' bejn,

<sup>6</sup> ad rayalt yabaa bejn por ni mal ni cayūjn bejn o ni cazajcaman, rayal yabaaman chi zē bejn xnejz.

<sup>7</sup> Guial rēn lasa' naj güün bejn perdon lasa'man ni güünnētzi reeman laaman, abi' chililadx

lasa'man, ad zadxag tēētaman cwēzaman ni cabēzaman, taan tēēman ni rüjnnētzi reeman laaman.

<sup>8</sup> Guial rēn lasa' ad yu't dxej loxan, per guialrajc yu' dxej loxan, ad zu tēetri bèn ni rudēēd ree xtiidx Dios loj ree bejn ni'qui ree bèn rnīee zienloj diidx.

<sup>9</sup> Din yan bal rayignia' ree, tibda'nzi naj ni rayignia' ree abi' bal radēēd ree xtiidx Dios loj ree bejn, tibda'nzi rayagbee ree xcwentaman.

<sup>10</sup> Per chi guidxin dxej yayignia' ree gran, dxel achetri lasajc ni rayagbee ree yan.

<sup>11</sup> Chi gocan xindoo gunen zi'c xindoo, benan xgab zi'c xindoo, go'pan xquiarguejxn xindoo. Per chi bidxin dxej gojcan bengol basa'nan gra guial xindoo tiblād.

<sup>12</sup> Ziangajc yan ad rayignia't ree gra zi'cgajc chi ad rguient zagdxē loj tijb guiaawajxn, per chi guidxin dxej yadxin ree lod zojb Dios dxel yayignia' ree gra. Yan yu'zi ni rignia'n per chi guidxin dxej guidxinan lod zojb Dios dxel günbeen gra zi'c nünbeeman naj.

<sup>13</sup> Choon naj ree ni ad yu't dxej lox, guialrliladx Dios, guialrbēz ni gunee Dios, nē guial rēn Dios dunuj ree. Per loj guiyon ree ni guin mazri lasajc guial rēn Dios dunuj ree.

## 14

### *Guialrnīee stijb diidx*

<sup>1</sup> Gol been naguiejn gol guyēn ree bejn, gol gurejdx gunab tēē Dios din gunee man xquiarguejndi din güüнди xmandadaman, per mazri rüjn naguiejn gapidi quiarguejxn par gudēēdi xtiidx Dios loj ree bejn.

<sup>2</sup> Bén rniee tijb diidx ni ad rignia't gra bejn, güünman cwent guial achut caneenëman. Tijbzi Dios caneenëman guial achut rignia' xtiidxaman, tijbzi laaman ragbee ni caneeman per bejn ree ad ragbeet reeman ni rën guiëb ni caneeman.

<sup>3</sup> Per tijb bën rulüü xtiidx Dios bejn ree cayünman yudar xhienaag chinal bejn xtiidx Dios, cudëëdaman consejw loj ree bejn ragu' tëëman luxdoo reeman.

<sup>4</sup> Abi' bën rniee tijb diidx ni ad rignia't gra ree bejn, par tijbzi laaman naj ni caneeman, per bën rniee xtiidx Dios cayünman yudar gra ree xbejn Dios din gusnuu chinal reeman xnejzaman.

<sup>5</sup> Bal zianclaa gradi niajc niniee zienloj ree diidx, per mejorlan bal zajc gulüüdi bejn ree xtiidx Dios. Din mazri lasajc guial guiniee bejn xtiidx Dios guial loj guial guinieeman zienloj ree diidx, o bajtëë bal zile' guiëbaman loj ree bejn xhie rën guiëb ni rnieeman din güün sirv ni rnieeman gra ree bejn.

<sup>6</sup> Din zi'c naj bal guitixlon lëjt compniar raliduladx ree Jesucrist, abi' ganen lojdi tijb diidx ni ad zignia'tidi, ¿xhieza sirv güünan lëjt bal id canin lojdi zagdxe ni balüü Dios naj o ni ragbeen o bal id canen xtiidx Dios lojdi zagdxe o xhietëëz zatijb ni rayal gusiididi?

<sup>7</sup> Zi'c tijb ni rucwejdx reeman, zi'c tijb bidxa o tijb arp bal id zucwejdx bejn laan zagdxe ad zignia't ree bejn xhienin cucwejdxaman.

<sup>8</sup> Ziangajc bal id zucwejdx reeman zagdxe trompejt loj wadijl, ¿xhieza naag chignia' reeman guial ma rayal suchaaw reeman par til reeman con ree bën rayal tilnë reeman?



<sup>9</sup> Yan ziangajc bal guinieenëdi bejn ree con tijb diidx ni ad rignia't reeman, jxhieza naag chignia' reeman ni rëbidi! Xlia'zi caneedi achut rignia' ni rnieedi.

<sup>10</sup> Lëjt ragbee guial zienloj diidx yu' loj guidxliuj guie, per graczan yu' ni rëban par bèn rignia' laan.

<sup>11</sup> Per bal chu guinieenë naj con tijb diidx ni ad rignia'tan dxel benzit najman par naj abi' za naj benzit najn par laaman.

<sup>12</sup> Zeel zi'c rëndi gapidi quiargueijn por xyudar xSprijt Dios par güündi xhietëez ni naj xchiin Dios, gol gunab loj Dios din yazaladxaman quiargueijn lojdi din gac güündi ni rüjn sirv par gra ree xbejn Cristo.

<sup>13</sup> Zeel bèn ni rniee tijb diidx ni ad rignia't gra ree bejn, rayal guiniabaman loj Dios din gagnëman laaman din gac gusignia'man bejn ree ni rëbaman.

<sup>14</sup> Din zi'c naj bal gabledx ganaaban Dios con tijb diidx ni ad rignia'tan dxel tijbzi da sprijtan ragbee ni canen, per naj ni'quid ragbeetan xhienin canen.

<sup>15</sup> Zeel ni rayal günan naj, gabledx ganaaban loj Dios con da sprijtan abi' gagbeen xhie rën guiëb ni canen. Ziangajc chi rolan cant ree par Dios rayal gagbeen chignia' tëën xhie rën guiëb ni cayolan.

<sup>16</sup> Din bal rnieel diidx zagdxe ree loj Dios con diidx ni ad rignia't ni'qui lüj. Dxel bèn za' con lüj, ad zajct guiëbaman “Amén” chi ma gulox badëëdil quixtëë loj Dios guial ad rignia'taman ni rnieel.

<sup>17</sup> Majsı nix da't badëëdil quixtëë loj Dios, per achetczi yudar beenl bèn za' con lüj par gagbeeman xhienaag chinalaman xnejz Dios guial ad bignia'taman ni rëbil.

18 Quixt e Dios naj mazri rajc zien loj diidx guial loj gradi.

19 Per majsi zian chi za'n lod rado'p ree dux compniar ree b n rliladx ree Jesucrist par ganen 'n laa reeman, par naj mejorli naj ganen 'n laa reeman con gaay diidx per diidx ni chignia' reeman n  ni g un laa reeman sirv din gul u reeman ben ren ree luar ganen 'n laa reeman con chiimil diidx ni ad rignia't reeman.

20 Compniar raliduladx ree Jesucrist, ad bal r jnridi xgab zi'c xindob z. Gol gojc zi'c xindob z per guial ad z jntidi ni mal, per par g undi xgab gol been xgab zi'c bengol.

21 Loj xtiidx Dios r b: "Gaxhalan b n rniece ree diidx ren, b n ad najt ree b n niz guie din guinieen  reeman b n guie ree. Per ni'qui zian ad zuzoobt reeman da diidxan, r b dux Dad ree Dios."

22 Zeel guial rniece zienloj diidx, najn tijb sen par ree b n ad rliladxt xtiidx Dios din chililadx reeman. Per guial rul u bejn ree ni r n Dios gagbee reeman, laan naj ni g un sirv par ree b n ma rliladx ad par b n ad rliladxt.

23 Per ni'qui zian chi radxaag lasa'di par gucaagdiajguidi xtiidx Dios, abi' bal suloj guiniee tijb gajdi gadxagayaa diidx ni achut rignia' abi' chu' ree b n qui bililadxri xtiidx Dios o b n ad waliladxt ree xtiidxaman,  wen id zanaladx reeman ya guial guijquidi rajc?

24 Per bal chu' b n qui bililadxri o b n ad waliladxt abi' caneedi xtiidx Dios, dxel chi guiguiejnman ni caneedi, gagbeeman xhie dol cay jn reeman, laagajcaman gagbee chu najman.

25 Zian gagbeeman xhienaag nabanman dxel guzuxibaman cwedx guiniabaman Dios, abi' guiëbaman guial diidxli za' Dios con lèjt.

*Gol been gra xnejz*

26 Gra ni canin lojdi compniar raliduladx ree Jesucrist, caninan din gagbeedi guial chi rado'pidi par gucaagdiajguidi xtiidx Dios, gradi zajc güün ni chile' güündi, bèn ni gool cant par Dios, bèn ni gulüü ree bejn, bèn gugojn bejn ree conin balüü Dios lojman, bèn guiniee diidx ren ni ad rignia't gra bejn në bèn gudëed xtiidxaman loj ree bejn. Per gra ni güündi güün sirv par güünan yudar los demazri ree xcompniaridi din gusnuu sudxi'ch reeman loj ni rililadx reeman xtiidx Dios.

27 Bal yu' bèn rniee tijb diidx ni ad rnieet gra bejn, tio'pzaman o choonzaman guiniee diidx ni rajcaman, abi' tijb gaj tijb gaj reeman guiniee, chu' tée bèn ni guiëb loj ree bejn xhie rën guiëb ni rëb reeman.

28 Per bal id yu' bèn zajc gugojn bejn ree xhienin rëb reeman con diidx ni rajc reeman, mejorli achet guiëb reeman delant loj ree bejn. Zagdxeli laazi reeman cwedx Dios lën luxdoo reeman.

29 Abi' ree bèn gugojn delant loj gra ree bejn conin balüü Dios laa reeman, tio'pzi reeman o choon reeman guiniee. Abi' los demazri reeman gucaagdiajg bal zagdxequi naj ni canee reeman.

30 Per bal tijb bèn zobj cucaagdiajg loj hor guin gulüü Dios laaman xhienin, rayal yacwëez bèn canee din gac gugojn bèn guin bejn ree xhie nin balüü Dios lojman loj hor guin.

31 Gra ree bèn ni bayal gudëed xtiidx Dios loj ree bejn, gradi zajc gugojn bejn ree xhienin balüü

Dios lèjt, per tijb gajdi chi yayalidi din gra ree bèn cucaagdiajg gusiid reeman chu' tée luxdoo reeman.

<sup>32</sup> Gol badxe'guijc guial ree bèn rudëë xtiidx Dios loj ree bejn laagajc reeman rniabee laa reeman din guinee reeman chi rayal guinee reeman.

<sup>33</sup> Din Dios ad rëntaman tijb ni ad najt xnejz, rënman tijb ni naj xnejz din yabedxe luxdoodi con ree xcompniaridi.

Yan, zi'c rajc gra ree luar lod rado'p ree xbejn Cristo,

<sup>34</sup> loj hor ni ma cucaagdiajg reeman xtiidx Dios ad yu't permis guinee ree béngunaa rayal guzoob reeman xtiidx xixinguaaaw reeman zi'c rëb Dios güün reeman diizd gulal.

<sup>35</sup> Bal xhie rën reeman gagbee reeman, mejorli lidx reeman guiniabdiidx loj lacheel reeman, din natun guinee tijb béngunaa loj hor ni cucaagdiajg reeman xtiidx Dios.

<sup>36</sup> Gol basaaladx guial ad lèjtit naj bèn yaløj cwa' xtiidx Dios ad tijb tée'tzi lèjt ragbee xtiidx Dios din güüнди zi'c naj xixgabidi.

<sup>37</sup> Bal chu bèn naladx guial ma cwa'man quiarguiejn par gudëëman xtiidx Dios loj ree bejn o por xSprijt Dios ma cwa'man xhie stijb quiarguiejn, dxel laa gagbee gajcaman guial ni cucan loj gui'ch guie najn zi'c rniabee dux Dad ree Dios.

<sup>38</sup> Per bal id rliladxaman ni canin lojdi loj gui'ch guie, ziangajc ad chililadxidi xtiidxaman.

<sup>39</sup> Yan zi'c ma rnin lojdi compniar raliduladx ree Jesucrist, gol been naguiejn din gapidi quiarguiejn din gudëëdi xtiidxaman loj ree bejn, ad

bal gudxoondi guiniee tijb ree xcompniaridi bèn rniee tijb diidx ni ad rignia'tidi.

<sup>40</sup> Per gra ni rüjndi gol beenan xnejz, gol beenan zi'c rayal.

## 15

### *Baban Jesucrist loj ree bengüt*

<sup>1</sup> Compniar raliduladx ree Jesucrist, rën tēen gusaaladxidi xtiidxza'c Jesucrist ni ma rnin lojd, diidxza'c ni ma bililadxidi loj ni za'dxi'chidi.

<sup>2</sup> Gol basaaladx guial por ree diidxza'c guin ma rajpidi perdon por xtolidi bal walidi zinalidi laan, per bal id zinalidi laan bililadx xlia'zidi laan.

<sup>3</sup> Yaløjxgaj balün lëjt ni basidan yaløj. Rnin lojdi guial Cristo güt por dux tol ree zi'c rëb loj xtiidx Dios.

<sup>4</sup> Abi' biguie'chaman dxel ni goc choon dxej babanman zi'cgajc rëb loj xtiidx Dios.

<sup>5</sup> Chi ma babanman, dxel balüülojman loj Bëd dxel loj los demazri ree apóstoles.

<sup>6</sup> Zianz balüülojman nē loj ree tijb cwaa ree bèn rliladx laaman, gojc reeman mazri de gaay gayuu bejn. Yu' reeman ma güjt, per mazri zien reeman sta naban.

<sup>7</sup> Balüü loj tēēman loj Santiaaw dxelri loj ree apóstoles.

<sup>8</sup> Ni bigra balüülojman lon, naj najn zi'c tijb xindo ni rajl chi ma gudëd tiamp ni rayal galix.

<sup>9</sup> Din naj ta'nzi lasajcan loj los demazri ree apóstoles, abi' ad rayalt guirii lan apóstol guial basagzin bèn rliladx ree Jesucrist.

10 Per guial naj Dios benza'c zeel najn ni najn, abi' ad bayaxlia'tzaman naj din naj mazri ma benan xmandadaman guial loj los demazri ree xbejn Jesús, majsi diidxiczi ad da xtijbt naj cayünan ni cayünan, në con xyudar Dios cayünan laan.

11 Zeel achet güunan bal por chunin biguiejndi xtiidx Dios bal por naj o por stijb ree xbejn Jesús, ni mazri lasajc naj guial ma biguiejndan abi' ma bililadxidan.

### *Yaban ree bengüt*

12 Yan zi'c ma balüün lëjt xtiidx Dios guial baban Cristo, ¿chexquiza zeel yu'di rëb ad zabant ree bengüt?

13 Bal id zaban ree bengüt, rën guiëban guial ad babant Cristo.

14 Abi' bal id baban Cristo dxel achet sirv ni caylüün lëjt, ache tëet sirv ni rliladxidi laaman.

15 Dxel bal zianan, ganax diidx rusquieen caynan por Dios guial ma ranan ma baban Jesucrist. Abi' bal id walin guial yaban ree bengüt, dxel ad walitan guial baban Jesucrist.

16 Din bal id zaban ree bengüt, dxel ni'qui Jesucrist ad babantri.

17 Abi' bal id babanman, achet sirv guial rliladxidi laaman ache tëet perdon yu' por xtolidi.

18 Bal naj zian, xt ree bén ma güjt achet xperdon reeman majsi bililadx reeman Jesucrist.

19 Bal lojzi guidxliuj guie güün sirv ni baliladx ree Jesucrist dxel dunujzi ree nayajc ree bén naban mazri naya guial loj chutëez bénan.

20 Per diidxiczi Jesucrist naj bén baban, abi' laaman naj quijb bén yaloj baban.

21 Abi' zi'c bidoonloj guialgüjt loj guidxliuj guie por tijb bejn, ziangajc por tijb bejn yaban ree bengüt.

22 Zi'c bidoonloj guialgüjt par gra ree bejn por Adán, ziangajc yan por Jesucrist ma yu' stijb guialnaban par ree bèn rliladx laaman.

23 Per gra gac zi'c rayal: Yaløj Jesucrist naj bèn baban, dxel chi gui'taman stijb dxel ma yaban ree bengüt bèn bililadx ree laaman.

24 Abi' chi ma beenman gan gunabeeman gra ree bèn rdxe'ch laaman, zi'c ree bèn rajp guialgux-tis në ree bèn rajp graløj guial rniabee, dxel ma yayü xguialrniabeeman loj dux Dad ree Dios.

25 Din rayal nabee Cristo xt chi ma beeman gan canabeeman gra ree bèn rdxe'ch laaman.

26 Abi' ni chigra gunidlojman naj guialgüjt.

27 Loj xtiidx Dios rëb guial Dios badëë guialrniabee loj Jesucrist din nabeeman gra, per ad rënt guiëban guial në Dios rniabeeman din Dios badëëd guialrniabee lojman.

28 Abi' dxej ni ma rniabee Jesucrist loj gra dxel yayüman guialrniabee ni badëëd Dios lojman din ma nabee tijbzi Dios gra.

29 Yan bal id zaban ree bengüt, ¿chexquiza zeel yu' ree bèn riobnijs xcwent ree bèn ma güjt, abi'za bal id zaban ree bengüt?

30 Achet sirv guial nadxu'n loj ni nadxeb gra hor.

31 Din rugojnan lëjt, gra dxej za'n loj guialgüjt, laan naj ni diidxli ni rnin lëjt zi'cgajc walin guial dad nix yu' luxdon con lëjt guial najdi xbejn Cristo.

32 Yan bal naabzi loj guidxliuj guie güün sirv ni cayünan dxel achet sirv ni basajc ree bèn Éfeso naj,

naj reeman bendoxh zi'c ree bedoxh. Din bal id zaban ree bengüt mejorli yagueien ree zi'c rëb ree bèn rëb: “Yadaaw ree yadü' tää ree din guixie ma bayëjt ree.”

<sup>33</sup> Per naj rni lëjt ad tiëbidi gusquiee reeman lëjt. Din guial ridxga' xtiidx ree bèn ni ad zët xnejz, najzan par guxhiinan zi'c nabandi.

<sup>34</sup> Zeel gol been xgab zi'c rayal ad bal rüjn tääridi dol din yu'di ni'quid nünbeetidi Dios, zeel canin lojdi zian din yaya'nxtudi.

### *Xhienaag yaban ree bengüt*

<sup>35</sup> Per wed yu'di rüjn xgab: “¿Xhieza naag yaban ree bengüt? ¿Xhienaag naj cuerp ni gap reeman?”

<sup>36</sup> Per xgab guin xgab tontzan. Din lëjt ragbee guial chi rxübin bejn tijb xhaj xhienin, chi rliejnan dxel rnijt xhaj ni guxübinman.

<sup>37</sup> Ad cwaan ni rliejn guint rxübin bejn, xhajnan rxübinman, zi'c rüjn bejn con trigo o xhietëez stijb xhaj nin.

<sup>38</sup> Per chi rliejnan ma najn cwaandoo zi'c rni-abee Dios gacan, xhietëez xhaj nin ni rxübin bejn ma yu' cwaando ni guilienan.

<sup>39</sup> Zi'c nadxaa xcuerp bejn con xcuerp ree be, nadxaa tää bëjl con xcuerp ree biguijn.

<sup>40</sup> Nadxaa tää ree ni yu' xanyabaa con ree ni yu' guidxliuj, nadxaa naj guialza'cdxoon ree ni yu' xanyabaa con ree ni yu' loj guidxliuj.

<sup>41</sup> Nadxaa xbacha' gubijdx guial loj bëëw nadxaa tää xbacha' ree bajl xanyabaa, xt ree bajl xanyabaa garent garen naj xbacha' reen.



<sup>42</sup> Yan ziangajc gac con guial yaban ree bengüt. Cuerp ni rguie'ch rodxan, per cuerp ni gap bejn stijb ad yu't dxej godxan.

<sup>43</sup> Cuerp ni rguie'ch rxinan, per chi yaban bejn stijb ma gapaman tijb cuerp za'cdxoon ni achet gac. Cuerp ni rguie'ch guin achet gojl yu'n, per chi yaban bejn stijb ma gapaman cuerp ni yu' gojl.

<sup>44</sup> Rguie'ch cuerp ni rajp bejn loj guidxliuj guie, per chi yaban bejn stijb ma gapaman tijb cuerp ni güün sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

<sup>45</sup> Loj xtiidx Dios rëb guial yaløj Adán gojp guialnaban loj guidxliuj guie. Dxel bi't Jesucrist, bèn razaladx guialnaban loj ree bejn.

<sup>46</sup> Ad yalojt rajp bejn guialnaban ni gapaman xanyabaa, yaløjxgaj rajpaman guialnaban loj guidxliuj guie dxel guialnaban xanyabaa.

<sup>47</sup> Adán gojcaman con yuj zeel najman bénguidxliuj, per Jesucrist xanyabaa zëédaman.

<sup>48</sup> Gra ree bénguidxliuj naj xcuerp reeman zi'c goc xcuerp Adán loj guidxliuj guie, per chi guidxin dxej dxel gap ree bejn tijb cuerp lasa' cuerp ni rajp Jesucrist xanyabaa.

<sup>49</sup> Din zi'c nayajc ree zi'c goc Adán loj guidxliuj guie, ziangajc yayajc ree zi'c naj Jesucrist xanyabaa.

<sup>50</sup> Abi' rugojnan lëjt compniar raliduladx ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios. Din ni rodx ad zajct chu'n lod yu' ni ad rodx.

<sup>51</sup> Per rënan gagbeedi tijb ni achutczi wayagbee xt yan guial ad dugrat ree yayëjt, per dugra ree

guidxaa zi'c nayajc ree, yaya'p ree cuerp ren.

<sup>52</sup> Laan gac chi yaguiejn ree trompejt ni gu-gojn dunuj ree guial ma bidxin tiamp ni yarii ree loj guidxliuj guie, dxel tibrajtzi zi'ctzi chi ruchip guiaaloj bejn zian guidxaa zi'c nayajc ree. Chi guibejdx trompejt guin yaban ree bengüt dxel ad yu'tri dxej guiët reeman abi' hor zii ma bidxaa zi'c nayajc ree yan.

<sup>53</sup> Din rüjn naguiejn guidxaa cuerp ni rodx por stijb cuerp ni ad yu't dxej godx guidxaa tëë cuerp ni rëjt por stijb cuerp ni ad yu't dxej guiët.

<sup>54</sup> Abi' chi ma bidxaa cuerp ni rodx por stijb cuerp ni ad yu't dxej godx guidxaa tëë cuerp ni rëjt por stijb cuerp ni ad yu't dxej guiët, dxejzii naj dxej ni ma gojc cumplid ni rëb loj xtiidx Dios lod rëb: “Xt guin ma bayaaloj gojc gan loj guialgüjt.”

<sup>55</sup> Nadxel tëë ma gojc cumplid zi'c rëb loj xtiidx Dios lod rëb: “Guialgüjt, ¿conza guial rüjnl gan? ¿Conza guial rusagzil bejn?”

<sup>56</sup> Guialrusagzi guialgüjt naj por dol, abi' por ley ragbee bejn guial dol guin naj ni rniabee laaman.

<sup>57</sup> Per quixtëe dux Dad ree Dios, bèn rüjn dunuj ree yudar par yaguieen ree gan por xguialgüjt Dad Jesucrist.

<sup>58</sup> Zeel compniar raliduladx ree Jesucrist zi'c rënan lëjt rnin lojdi, gol guzudxi'ch ad chu' tëë luxdoodi tio'p. Guixie guixie gol been naguiejn güüнди mazri xmandad Dios, din lëjt ragbee guial ad ni xlia'tzi gra ni cayüjndi par Dad Jesucrist.

## 16

*Milia ni rdo'p par ree xbejn Dios*

<sup>1</sup> Yan por milia ni naj guto'pidi par g undi yudar stijb ree dux compniar ree b n raliduladx ree Jesucrist, gol been zi'c gunabeen g un ree b n rililadx ree Jesucrist niz Galacia.

<sup>2</sup> Gazob dumingw tijb gajdi gol gule'c cintabl zi'ctzi beendi gan l n toxman, din chi guialan ad r jntri naguiejn guido'pidi milia guin.

<sup>3</sup> Abi' chi guialan, b n ni gucaabeedi par gaxhalan laa reeman chigsa'n gon guin Jerusal n gaxhalan laa reeman con gui'ch ni gui b chu naj reeman.

<sup>4</sup> Abi' bal guguian guial r jn naguiejn gan dxel chin 'n laa reeman.

### *Xhienaag naj xixgab Pab*

<sup>5</sup> Yaloj gad edan niz Macedonia dxel guialan Corinto guidganan l jt.

<sup>6</sup> Wed xchej gazun con l jt. Wed guidib tiamp nayaag gazun con l jt, dxel g undi naj yudar din gan lod naj gan.

<sup>7</sup> Ad r ntan gad edzi nejzan gaguixlon l jt, r nan gaglaan con l jt bal gunee Dios permis.

<sup>8</sup> Per yan naj yaya'nan  feso xt lanij pentecost s,

<sup>9</sup> din guie merczi yan cati jb ree bejn cucaag-diajg reeman xtiidx Dios, abi' rul   zien reeman chililadx laan, majsi zien gajc reeman rdxe'ch naj por zian.

<sup>10</sup> Chi gui't Timoteo, gol been naguiejn din suman zagdx con l jt, din lasa'gajc xmandad Dios ni cay nan cay jnman.

<sup>11</sup> Zeel achu l jt guiniajgaa lojman, gol beenman yudar din gusnuu xnejzaman sin guial chu'man

xgab, din gui'taman guie lod cabëëzan laaman con los demazri ree dux compniar ree.

<sup>12</sup> Abi' Apolos, naj guza'c laaman liaadx din nidnëman laa reeman nitixloj reeman lëjt, per ad guyëntaman ni'taman yan, per zi'tcaman guitixloj-man lëjt chi guneen laaman tiamp.

### *Diidx bigra ni bacaa Pab loj gui'ch guie*

<sup>13</sup> Gol guzujsin gol guzujdxi'ch tëë loj ni rliladx-idi Jesucrist. Gol gudaan ni gui'tzi gol guzujdxi'ch tëë.

<sup>14</sup> Gra ni güüнди gol beenan guial rëndi bejn ree.

<sup>15</sup> Compniar raliduladx ree Jesucrist, lëjt ragbee guial Estéfanas con xfamilaman laa reeman naj bën yaløj bililadx Jesucrist niz Acaya, ragbee tëëdi xhienaag cayüjn reeman yudar dux compniar ree bën rliladx ree Jesucrist. Zeel rnin lojdi:

<sup>16</sup> Lasa' ree bën guin gol bazoob xtiidx reeman con gra ree bën cayüjn xmandad Dios në ree bën cayüjn yudar cayajc mandad guin.

<sup>17</sup> Dád nix guyu luxdon chi baguiaad Estéfanas guie, në Fortunato në Acaico. Din por laa reeman guza'can zi'cgajc chi za'n con gradi.

<sup>18</sup> Laa reeman bagu' luxdon niz guie zi'c ragu' reeman luxdoodi, abi' lasa' ree bën guin gol gojp reeman respejt.

<sup>19</sup> Gra ree compniar rliladx Jesucrist niz Asia guie rugajpdioz reeman lëjt. Abi' Aquila con lacheelaman Priscila con gra ree xbejn Cristo bën rado'p ree lidx reeman, rugajpdioz reeman lëjt, nayajc ree xbejn Cristo.

Gui'ch yaløj par ree bèn Corinto 16:20liiiGui'ch yaløj par ree bèn Corinto 16:24

<sup>20</sup> Gra ree dux compniar ree bèn rliladx ree Cristo rugajpdioz reeman lëjt, gol bagajpdioz tëë lasa'di zi'c rayal.

<sup>21</sup> Naj Pab, quijb naj cuca lëjtr guie ree par gugajpdiozan lëjt.

<sup>22</sup> Bal yu' bèn ad rënt dux Dad ree Jesucrist, laaman ma rayal xcasti Dios. ¡Dux Dad ree Jesucrist nayob gui'taman!

<sup>23</sup> Abi' dux Dad ree Jesucrist güünle' gradi.

<sup>24</sup> Zi'c nayajc ree xbejn Cristo tiblojzi rënan gradi. Amén.

**Xtiidx Dios**  
**New Testament in Zapotec, Santo Domingo Albarradas**  
**(MX:zas:Zapotec, Santo Domingo Albarradas)**

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Santo Domingo Albarradas

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

fb4ebcb8-e1f4-5bfc-b08c-f590e137d86d